



### TAPAK 9

Opposition teloktepi  
tamakok angutsü: Naidu



### TAPAK 10

Christopher Wray FBI  
director inyaktsü: Trump

## July 17 nü India Tir election agitsü

**New Delhi, June 7 (Agencies):** July 24, 2017 nü India tir Pranab Mukherjee indang kümsük tembangtsü aser iba atema Bodbarnü Election Commission of India (ECI)-i July 17 nü tir election agitsü osang metetdaksüogo.

Tir election indang vote ji July 20 nü azüngtsü aser iba dak sendakba nung June 14 nü osang ka agütsütsü, ta Chief Election Commissioner Nasim Zaidi-i osangbener dang ashi.

"Tir election atema tenüng agütsüba anogo tatembangbaji June 28 nü asütsü. June 30 nü candidate tem kuli reprangtsü aser tenüng meyipa agiba anogoji July 1 nü asütsü" ta Zaidi-isa shisem. July 17, 2017 anepdang 10:00 ako nungi vote agütsü tenzüktü aser ibaji nikongdang 5:00 ako tashi agitsü. July 20 anepdang 11:00 ako nungi vote azüngtsü aser kasa anogo nung Vice-President indang election agitsü, ta CEC-isa metetdaksü.

## TYO-i Kohima Mini Zoo nung ozütem chiok

**Kohima, June 7 (TYO):** Tsütuoonuomia Youth Organisation (TYO), Kohima Village den taoba sorkar ketdsangser K K Sema aser Mini Zoo Kohima kibur, Rüvuotuo Belho nungertemi Bodbarnü ozü 30 chiokogo.

Kümshia TYO-i "In act of love for our beautiful animals" omen nung ajemdaker Gasie nung aliba Mini Zoo nung ozütem chioker.

Mini Zoo ya Rüvuotuo-i 2004 küm lapok aser iba zoo nung ozü aser shirurur tapu 36 lir. Mini Zoo ya Honibar aser Deobar anogotem, anepdang nungi nikongdang tashi public atema lapoker. Zoo reprangnür nisung shiai sen 20 agütsür reprangtsü akok saka arishi küm 10 tashi tanurtem dangbo sen magir.

(Maneni tapak 12 nung...)

## BJP lennirtemi pei chirnurtem tribal kibongtemden kibalembudakjang: Ravi Naik

**Panaji, June 7 (Agencies):** BJP lennirtemi tribal kibongtem semdanga chiyungba aija taoba Goa Chief Minister, Ravi Naik-i BJP lennirtem dang parnok chirnurtem Dalit aser tribal kibongtemden kibalembudakjang ta tayongzüka ka agütsüogo.

Naik-i osangbenertem dang sensaksemdang, tribal kibongtem nung tables aser chairs lir, saka taoba hopta ka shi BJP MP aser MLA temi ali nung mener chiyunga sayubaji parnok tenüng tajung agitsü atema dang lir, ta ashi.

"BJP lennirtemi parnok (educated) jabasotem aser jalatem tribal kibongtem nungi (educated) jabaso jalatemden kibalembudakjang. Iba sülenji parnoki taküm piyong Scheduled Tribe purtem indang chiyungtsü chitetsü. Parnoki iba mapa inyaktetra, ni BJP lennirtem ajak nem tetushi agütsütsü" ta Naik-isa shisem.

Union Minister of State for


Home, Subhash Bhamre-i anogo ishika tejaklen Goa nung tribal kibong ka nung chiyungba sülen Naik-i iba osang metetdaksü.

BJP-i linük ajungalen Scheduled Caste aser Scheduled Tribe nung züngsema aliba aser loktiliba nung teküpoktiba jengang nung alirtem den sendakteptsütsü atema maparen tenzüka nung iba ya shilem ka lir.

Goa nung tribal pur rongsenkettsüng tsütsü jengang ajungketogo aser parnok kidang tables aser chairs lir, ta Naik-isa osangbenertem dang ashi.

"Kechiba BJP lennirtemi ali nung amener. BJP lennirtem kidang sorochioktsü atema ST, OBC nisungtem mapa inyaktsü yua lir. Parnok anogoshia parnoki sorochiokba chiyunger. Kechiba parnoki iba mapa inyaker? Parnok kechi tangatetba nung tenüng atema iba mapa inyaker" ta Naik-isa asüngdang.

## Mon nung telungpur 3 den army ketdangser ka khaset



Mon district kübok Lappa nung sepaitem ngutetba prangpong-injangtem noksa nung angur.

**Kohima, June 7 (TYO):** Nagaland kübok Mon district nung sepaitem telungpur tsüngda khatepdang 164 Territorial Army (TA) ketdangser ka den civilian ka dena nisung pungu asü, ta tanü osang metetdaksü.

Iba lendong ya Tizit sub-division kübok Lappa yimtsüng nung yasüng atalok aser army jawan asem yirur anepaludar.

164 Territorial Army (TA) nung tasüsangji Major David Manlun ta jangjaogo aser yirua alirtemji Assam kübok Military Hospital Jorhat nung anepalura, ta defence otongdar kati ashi.

NSCN(K) aser ULFA külem telok ka Lappa tesem nung lir ta osang tejangja angazükba sülen yasüng 11:00 ako meta Headquarter Inspector General Assam Rifles (North) kübok TA aser 12 Para sepaitemi iba tesem mita aodang khatep, ta otongdarisa shisem.

Sepaitemi maneni iba tesem nung telungpurtem bushidar aser tasüsang asem ngutetogo saka parnok indang maitsü ano mejangjateti lir.

Iba tesem nung sepaitemi AK-56 ka, AK Chinese made 2, grenade 2, IED 3 aser injang

round 270 ngutetogo.

Ano külen, Tizit nung police osang ka ajanga ashiba agi, ULFA züngsemtem ta temulung melemi bilemer nisung asem den parnok mena aliba auto-rickshaw indang driver dena khaset.

Telungpurtemji koba telok nungi'ar mejangjatet saka parnokji auto-rickshaw ana nung mener lia sepaitemi amak.

Mezüngbuba auto-rickshaw nung mena alirtemjibo jena ao saka tanabuba nung mena alirtemji khaset. Iba tatalokba atema bushisüngdang ka tenzükogo, ta police-isa metetdaksü.

## Menoknok nungi Nagaland jenbua mali: Pankaj Kumar



June 7, 2017 nü Capital Convention Centre Kohima nung Chief Secretary Pankaj Kumar-i Incident Response System indang workshop nung o jembiba angur.

**Kohima, June 7 (TYO):** Nagaland nung menoknok nungi jenbutsü inyakyim melii kiojen aika yanglur. Anungji, asen state nung menoknok tesashi nokra, ki aika chireptsü, ta Chief Secretary, Pankaj Kumar-i tanü ashi. Nagaland State Disaster

Management Authority (NSDMA)-i National Disaster Management Authority (NDMA) den yaritepa Incident Response System (IRS) indang training tenzüka sentong nung jembidang Pankaj Kumar-i iba olen ashi.

Anogo ananü atema training ya Capital Convention Centre, Kohima nung agir aser Chief Secretary, Pankaj-i ashiba agi, Nagaland ya Earthquake Seismic Zone-V kübok lir aser menoknok tesashi anak nungbo ki aika chireptsü, kechiyong Nagaland nung 'earthquake resistant technology' medeni kitem yanglur.

Nagaland nung April nungi September tashi tzünglu arur aser October nungi March tashi tzünglu marur. Iba mongpu anaprong nung alima lendong balala ataloker. Tzünglu aruba mapang state kübok tesem aika nung anentsüh aser tzümetstüng ataloker, aser tzünglu maruba mapang alutem nung tzü akongba aser kitsükkirong lendongtem ataloker, ta paisa ashi.

(Maneni tapak 12 nung...)

## NE nung state BJP tirtemi nashi tetuyuba atema khuret abener

**New Delhi, June 7 (Agencies):** BJP tir Amit Shah-i North-East semdangtsü aliba jakdang, party state unit tirtemi nashi indang tenokdangba agütsüba ajanga NE nung BJP-i tetsükdaktsü ajurutsü aser national party ka indang jengang raksatsü akok ta metetdaksüogo.

Assam, Arunachal Pradesh, Meghalaya, Mizoram, Nagaland, Tripura aser Sikkim nungi BJP unit tirtemi osangbener dang ashiba agi, parnok state tem nung tenokdangba tasentem

magütsütsüla. "Iba tenokdangba ya yanglushitsüla" ta Assam BJP tir Ranjeet Kumar Das-i ashi aser külen Nagaland BJP tir Visasolie Lhoungu-ia "iba onük ya Nagaland nung alirtem atema tebilemstü ka lir. Iba mesükba telemtetbatem ajanga BJP-i North-East sobaliba anema nokdaker ta mashileni angatetsü akok" ta metetdaksü.

Centre sorkari nashi metepsettsü aser ozüng alema shibelen masütsü tetuyuba agütsüba anema Meghalaya

nung BJP tongti lennir anati party toktsüba sülen, Mongulbarnü BJP tirtemi parnok tebilembatem lemsatet.

Hombar aonung BJP North Garo Hills district tir Bachu Marak-i party nung anen aser taoba hopta West Garo Hills district tir Bernard Marak-ia kasa onük nung ajemdaker party toktsü. Garo nungeri akhidang nung nashishi chia arur aser ibaji parnok sobaliba nung lir, ta shia Meghalaya nung BJP lennir anati iba telemtetba agia liasü.

(Maneni tapak 11 nung...)

**TANGATETER  
OCHISHIR  
JAKLA TAJUNG AKETBA  
ASER  
NÜBORTEM  
DANG  
KANGA MEIMBA  
NISUNG NEM  
VOTE AGÜJANG**



## Mkg IDBI bank nung 'Customers Day' sentong aka DIPR Coordination senden amen



Mokokchung IDBI bank nung customers day sentong agir külen yangji inyaktertem den shilem agia adener customer-tem külemi tangokba noksa nung angur. Mokokchung, June 07, 2017.

**Mokokchung, June 7 (TYO):** IDBI Bank Mokokchung Branch-i "Customers Day" ta sür Bank nung inyaker aser customer na tsüingda sensaksem sentong tajung ka parnok bank nung ayongzüka kaogo.

Iba sentong ya tongtibangsa banker aser costumer-tem tsüingda tesendaktep akangshiba den nüburtemi bank maparen aser yimya tali angajemdaktsüsü nükjidong yur ayongzüka lir, ta Mokokchung IDBI Bank branch manager Wt. Zülusenla-i ashi.

Bank ka takok ngua aotsü atemaji aroki shilem agiba ajanga dang nükjidongji

ataloktsü, anungji, tapu balala aser item indang tetemlok (interest), sen ayuba yimya (savings & fixed deposit) tapu balala aser interest-tem, card tapu balala aser cheque book amshiyim, item indang kanga junga rateta shia liasü.

Mokokchung nung IDBI bank tenzüker küm pezüububa lir, aji oda, nübur nem akokba tashi service tajungtiba agütsü meranga arudaki, tanü tashi arudang nüburtemi amalitepa nungitba asoshi laisa pelaba olen ka shisem.

Iba sentong nung Mokokchung IDBI Bank Branch Manager Wt. Zülusenla-i anir par külem inyaktertemi, e-banking (digital banking), loan

mapang nung mangyimer kibong nem tashi aser tesünep agüjang ta sasrademtsür, ta sangdong nungsa shia lir.

Raj Bhavan, Kohima nung pa den asüpila sentong tatsüka agia liasü, aser iba sentong nung par medemertem aser Raj Bhavan ketdangsertem den staff tem aden. Regmi-i pa kinüngtsü den tanur ana toktsür alima nungi pila. Pa den tatembangbuba asüpila sentong atema pa tasümgang Bragatinagar, Nepal-i bener ogo.

## Angh, Acharya-i Prasad Regmi asüba atema mangyimer

**Kohima, June 07 (TYO):** Than Prasad Regmi anojungi June 06, 2017 nü alima nungi pilaba atema Nagaland Angh, PB Acharya, pa kinüngtsü, Kavita Acharya aser Raj Bhavan, Kohima ketdangsertem aser staff temi mangyimer, ta Raj Bhavan sangdong ka nung metetdaksü.

Asür Prasad Regmi ya 2010 küm September 16 nü nungi tenzüka Raj Bhavan nung inyaka aruogo, aser pai kanga nendaka tenzüko, ta sangdong nung shia lir.

"Pa dak teyarini yimya keta liasü aser pai külem tenzükertertem den amalitepa meranga inyaka aruogo. Pai temaba ketdangsertem kanga akhümsübu. Pa anojungi asüba ajanga Raj Bhavan-i jashia mangyimer, aser pa den metettepa alir ajak atema iba ya tesasatsüka lir," ta sangdong nungsa shia lir.

Iba ama tejashi mapang ka nung Raj Bhavan, Kohima-i mangyimer kibong den külemi mangyimer aser ajak takoksang Tsüingremi iba ama tako

mapang nung mangyimer kibong nem tashi aser tesünep agüjang ta sasrademtsür, ta sangdong nungsa shia lir.

Raj Bhavan, Kohima nung pa den asüpila sentong tatsüka agia liasü, aser iba sentong nung par medemertem aser Raj Bhavan ketdangsertem den staff tem aden.

Regmi-i pa kinüngtsü den tanur ana toktsür alima nungi pila. Pa den tatembangbuba asüpila sentong atema pa tasümgang Bragatinagar, Nepal-i bener ogo.

## Phek nung Fete Day cum sales day ayonga kaogo

**Dimapur, June 07 (TYO):** Bethany 2 Youth organization Phek-i ayongzüka June 7, 2017 nü Church junction, Phek jila nung Fete Day cum sales day ayongzüka kaogo.

Iba sentong ya Bethany 2 Youth Organization Tir, Vechihu Khamo leniba nung agi aser Bethany 2 Youth Organization tatong Tir, Vedekho Venuh-i tepela o

jembia liasü.

Iba sentong takok ngua katetba atema organizing committee-i shilem agirtem aser temeimer ajak dang pelaba metetdaksü.



June 07, 2017 nü Chief Minister's Office, Nagaland Civil Secretariat, Kohima nung Life Member aser taoba mapang Nagaland Bharat Scouts & Guides (NBS&G) Tir, Nagaland Chief Minister, Dr. Shürhozelle Liezietsu NBS&G Patron shimba sentong nung tangokba noksa nung angur.

**Kohima, June 07 (TYO):** June 07, 2017 nü IPR Officers' Conference Hall, Kohima nung Department of Information & Public Relations coordination senden ka amen, aser iba senden nung department kübok section balala nungi ketdangsertem dena liasü.

Iba senden nung jembidang IPR Director, Limawati Ao-i ketdangsertem dang pei nem lemzüksüba mapa ajak nendaka inyaktü, aser pei ataba tesem nung tenzüksü atema renema alitsü ajungshia liasü.

Department ajungkettsüsü aser tajungba akumtsü atema inyaktüsü ketdangsertem teinyaktüsü shilem lir, ta paisa

ashi.

Paisa ketdangsertem dang, directorate nung süaka mesüra district tem nung süaka kanga khuret bena inyaktüsü aser temaba ketdangsertem meliaka pei teinyaktüsü shilem junga inyaktüsü metetdaksü.

Senden nungsa Journalists Welfare fund indang jembiba den külemi tawa ayonga amungba mezüngbuba Nagaland Film Festival indanga repringshia liasü.

Senden nung ketdangser taintemi parnok tebilemba lemsatepba den külemi department inyakyim tajungba akumtsü atema tebilemba onüktem benoka liasü.



June 05, 2017 nü Chuchuyimlang yimdak 'World Environment Day' amungdang tetushi tejaoker, Deputy Director of School Education, S.T. Nokdang Longkumer-i süngdong ka temtsüba noksa nung angur. Land Use Planning Committee (LUPC), Chuchuyimlang-i iba sentong ayongzüka atema Nokdang-i parnok nem tenüngsang agüja liasü. Kasa sentong nung Village Council Chairman aser Arogo Pastor-ia süngdong temja liasü. Iba anogomung nung Chuchuyimlang Baptist Arogo-i kiyong shia nem süngdong tatemtsü noklang kaka lemja liasü. Iba sentong nung village council züngsemtem, Gaon Buras, Arogo lenirtem, Watsu Unit executive züngsemtem, ward ajunga nungi executive züngsemtem, kaketshir lenirtem aser lokti atema inyaktertem dena liasü.

## Temesepba mozü aser gari auyartem apu

**Dimapur, June 07 (TYO):** May 27, 2017 nü Dimapur Police-i Chumukedima nung Maruti Gypsy gari ka soter mita repringdang ganja seret 110 shi apu, aser iba dak sendakba nung Phek kübok Elyinimi nungi Pfulo Mero'er jabaso, Neikhrope Mero apu, ta tanü Addl. Dy Commissioner of Police/PRO, Dimapur Nagaland-i sangdong ka nung metetdaksü.

Ano June 6, 2017 nü Dimapur Police kübok 9 NAP (IR) sepaitemi mita repringba mapang ganja seret 10 apu aser iba dak sendakba nung Banskuli, Jharkhand nungi asür, Dasrath Gorain'er jabaso, Sonatam Gorain puogo, ta sangdong nungsa shia lir.

Maneni June 07, 2017 anepongi Dimapur Police kübok Mobile Units-i 7th Mile nung West Bengal registration Maruti Swift ka soter mita repringdang 'Father's Day' sempet agütsüsü taseptsü ka telung nung temesepba mozü aika mima bener lia puogo; iba taseptsü nungji Spasmo Proxovon süngjang 23,800 aser Nitrojen süngjang 1,500 shi liasü, aser iba dak sendakba

nung nisung ana- Makhil village, Senapati nungi Chopfkiozho'er jabaso, Besil Ozhi aser Topawanglika, Imphal East nungi Zila Meiti'er jabaso, Deepak Meiti na puogo, ta kasa sangdong ajanga metetdaksü.

May 31, 2017 nü mejangjaba nisung anati Hojai nungi Dimapur tashi Maruti Swift ka 'hire' asüba sülen driver nemji mozü chidaktsür Purana Bazaar, Dimapur nung toktsür gariji auyar ao. Iba sülen Dimapur Police AVTS den East Police Station staff temi Toluzuma kübok tesem ka nung auyaba gariji angu, iba tesem nungjisa gari balala indang registration plates, tires, gari parts aser gari auyadang amshiba oset balala angu, ta Dimapur Police-isa metetdaksü.

Iba dak sendakba nung tang tashi nung nisung ana pua lir, aser tenaji Khumai village, Senapati nungi Nangpou Tungam'er jabaso, Zhoveo Tungam aser Kumai village, Senapati nungi Dakho Tungam'er jabaso, Shiba Tungam na lir, aser tenaprong tang telidak tesemji Toluzuma village, Dimapur lir, ta kasa sangdong ajangasa metetdaksü.



### Scooty aser Dumper na tsüktepba lendong nung ka asü



**Naharlagun, June 7 (Agencies):** Tanep 4:30 shi nung Hatimatha, D Sector, Naharlagfun anasa NH-415 nung Scooty ka aser dumper ka ta tsüktepa nisung ka asü aser ka kanga mejungi yiru.

Iba lendong nung scooty nung mena alir anaprongla kanga mejungi yirua lendong atalokba tesem anasa aliba mozüki ka bushia anir ao. Yirusang ana ya Hage Taka'er jabaso Hage Nado aser Gyata Taka'er jabaso Gyati Talley ta jangjaogo. Hage Nado ya 4th IRBN nung ASI lir aser pa temang kanga mejungi yiruba

ajanga 5:30 shi nung mozüki nung süadok. Gyati Talley ya Doimukh Police Station kübok Head Constable lir, pa temang kanga mejungi maneni mozüki nung anepaludar.

Osangbenertem den jembidang SP, Dr. A Koan-i ashiba agi, scooty aser dumper na tsüktepba lendong nung 4th IRBN nung SI Hage Nado aser HC Gyati Talley na kanga mejungi yirua liasü. Iba lendong atalokba sülen dumper anisangji jena oadok. Hage Gambo nungi osang angazükba sülen Naharlagun Police Station nung gari anisang anema ken o ka benokogo aser

pa bushi tenzükogo.

Dr. Koan-isa ashiba agi, check post ajak nung garitem bushisüngdangba tali kümogo.

Gari lendong tali atalokba dak sendakba nung asüngdang dang pai ashiba agi, traffic ozüing nung ajaki anidaktsüla kechiyong iba ozüingji ajak kümzuka ayutsü asoshi lir. Gari anirtemi pei aser tanga asoshi bilemtsüla. Gari anidang yi jemer manitsüla mesera phone mamshitsüla. Tetsüing pezü aketba gari nung amenertemi set belt mapang ajak nung agitsüla aser tetsüing ana aketba gari anishirtemi helmet agitsü nüngdaker.

### Assam nung tzümetsüing ajanga nisung lakh ka shi dak kongshiogo

**Guwahati, June 7 (Agencies):** Assam kübok Lakhimpur aser Karimganj district nung alir nisung lakh ka dak tali tzümetsüing agi kongshia kangshidar. Kasa mapang nung state nung ayong pezü lendong temaitsü agütsüba adena atur yimdar.



Assam State Disaster Management Authority (ASDMA) ajanga ashiba agi, district ana nung nisung 1,01,809 tzümetsüing agi kongshir kangshidar aser yimtsüing 140 tzü agi metsüingbanger lir. Tzümetsüing ajanga ali hectar 385.67 nung adoka aliba t s ü n ü s e m p o n g t s ü t e m raksatsüogo

District ana rongnung Karimganj, tzümetsüing ajang kanga mejungi kongshiogo aser idakji aliba nisung 97,000 dak tali kangshidar. Kasa mapang nung Lakhimpur district nung tzümetsüing ajanga nisung 4,500 dak tali kongshiogo, ta osang

ajanga metetdaksü.

Ketdangsertemi relief camp ka lapoker lir aser idakji nisung 113 jenoka lir. Maneni ketdangsertemi relief agütsüba tesem 130 lapokogo.

Golaghat kübok Numaligarh tesem nung Dhansiri ayong lendong temaitsü agüja aliba adena atur yimdar yamaji ano Karimganj kübok Badarpurghat nung Barak ayong, Matizuri kübok Hailakandi tesem nung Katakhal ayong aser Karimganj jila nung Kushiya ayong ta lendong temaitsü agüja aliba adena atur yimdar, ta kasa osang ajanga metetdaksü.

### AAPSU-i sorkar amokmeren

**Itanagar, June 7 (Agencies):** Chakma aser Hajong refugee tem nem lisopur jenjang agütsütsü asoshi Centre sorkari telemtetba agiba dak sendakba nung June 10 tashi nung iba dak sendaka aliba lokti ajak senden ka state sorkari mayongzükra mapang telatet ka makai longkak aittsü, ta All Arunachal Students' Union (Aapsu)-i sorkar amokmeren.

Kaketshir lokti-i May 27 nü senden ka nung iba keno dak sendakba nung lokti senden ka akatsü asoshi lemtet aser iba senden nung state nung MLA 59 aser state nungi MP asem prongla kechi südir süaka adentsüla ta lemtet. Iba sülen parnoki chief minister Pema Khandu dangi tezüluba nung June 10 nü tashi nungbo iba senden akatsü asoshi takhangba ka agütsü.

Chakma aser Hajong kintem ya 1960s mapang nung parnok aliba li Kaptai dam nungi tzü

moshiba ajanga metsüingbangadok aser iba ajanga parnok Arunachal nung arua jenoktsüsa aküm. Parnok Arunachal-i aruba mapang nungi tenzuka tang tashi keno balala adoka arudar. Refugee temnem lisopur jenjang agütsütsüba sentong ya 1990 nungi tenzükter kaketshir lokti-i anir anema arudar. Parnoki ashiba agi, refugee tenem lisopur jenjang agütsüra tribal tem state nung minority akümtsü.

"Tezüluba nung takhangba agütsür joko anogo 7 shi aoer, saka sorkari tang tashi kecha telangzüba magütsür. Iba amala tongtibang ken o ka nung sorkari iba amala yimya benshiba ya magizükteter," ta Aapsu tir Hawa Bagang-i ashi.

"Sorkari iba senden mayongra mesüra MLA aser MP tem iba senden nung medenra parnoki iba sülen

atalokba khuretji abentsü," ta paisa ashi.

"Centre sorkari Arunachal nungertemji yimjung meimba kin ta angatetsüla aser yamaji dang toktsütsüla. Mapang ka nung sorkar dang refugee tem aser onok na tsüingda shimtsü asoshi onoki asüingdangtsü aser iba anogoji marudaktsüner," ta pai maneni shisem.

Bagang-i ashiba yarisema Aapsu general secretary Tobom Dai-i ashiba agi, "Onoki Centre aser state sorkar nem tezüluba nung takhangbatem aika agütsüogo aser lisopur jenjang agütsütsüba dak sendakba nung telangzüba tajung mangur. Center-i Arunachal ya nisung dokdendak ka kümdaktsüogo aser onoki iba ya joko magizüktetsü."

Ajisüaka Soraka otongdar Bamang Felix-i ashiba agi, sorkari kaketshir lokti nungi kecha osang mangu.

### Ketdangsertemi ki 120 rongtoktsü

**Guwahati, June 07 (Agencies):** Bodhbarnü Dibrugarh district administration-i Brahmaputra ayong kümbang nung ali atsüing ki sür aliba aika rongtoktsü.

Iba ki azüingtetba maparen ya Fulbagan tesem nung inyakdar. Ketdangsertemi Dibrugarh jila anasa ki 120 rongtoktsü.

Te met et tsü ka ji ketdangsertemi taoba mapang nung item nisungtem aiben iba tesem nungi meindokadokogo, saka parnoki Brahmaputra tzüküm nung maneni ali atsüing arua alir.

Iba tesem nung tensa mejungi kümogo saka tensa azioktsü atema security force talila yokogo.

### BSF puri nashi chang shibelener ana apu



**Shillong, June 6 (Agencies):** BSF puri East Khasi hills nung nung nashi chang shibelener ana nashi ana bener puogo. Nashi ya Alto gari ka nung bener lia apu. Shibelensang ana ya Sonwell ( 17 ) aser Jewellson Kharwan ( 18 ) ta jngjaogo. Tenaprongla ya Meghalaya nung alir. BSF puri Alto gari den tena ket nungi India nung sim card inoker phone ana aser India nung sen 4380 ta ngutetogo.

BSF puri Bangladesh-i ozüing alema nashi chang shibelenba meita ao tenzükba sülen taoba itatem nung nashi chang nung sen jenjang ajungketogo. BSF puri maneni nashi chang shibelenertem aputsü asoshi inyakdar. Border Security

Force-i Indo-Bangladesh arrtsü nung ozüing alema inyakba maparentem nokdangtsü asoshi meita aoba sentongtem tali akangshiogo.

Tanga tatalokba ka nung BSF sepai temi west khasi hills nung Bangladesh nungi India-i nashi 19 shibelenya lia puogo. Ajisüaka arem aser tamang dak jenoker shibelenertem jena oadok. Shibelenertemi tasa balala asaa shibelenba mapa inyaktsü asoshi meranger saka iba amala tasa balala nem mashiokdaktetsü asoshi BSF sepaitem kanga junga training agir lir.

Maneni shibelenertem aser parnoki apuba nashitem ozüing agi melaba ama obendangtsü asoshi ketdangsertem nem bendanga agütsüogo.



Guwahati, June 07: Bodhbarnü Guwahati kübok Rabindra Bhawan, State Art Gallery nung DAVP pur indang "Saath Hai Vishwaas Hai, Ho Raha Vikas Hai" Exhibition lapoktsüba sülen MLA, Siddhartha Bhattacharya-i semdangba mapang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR THURSDAY, JUNE 08, 2017

### MACHINE DAK TEMULUNG MALEMER

**T**awa Uttar Pradesh election nung BJP teloki takok tulu angubaji yimten telok aika asoshi meimlaba takok liasü, ibayongji parnoki Electronic Voting Machine (EVM) aitsü. Atangji, electronic machine ya nisungi yangluba oset ka dang asünungji nisungi pei mulungbalen atsünga inyakdaksütsü asoshi machine nung electronic inyakyimji mashi ka nung sayangtsütsüa akok. Tatishitsü agi, tanü asüngbo shishilembadak seret aotsü atema electronic machine dang amshir, anungji tayokeri tajangzük talila aginü dang seret aoba electronic machineji telonglen tera perepketa toktsütsüa akok, iba jagi oset agi seretbo matu saka seret nung aliba meter agibo seret atua sayutsü. Iba amaji nisungi yangluba oset agi nisungtem ashioksütsü koka lir. Itemji teyanglurtemi dang metet. Atangji, angatetsü atema tatishitsü amshir dang ashi, dokan nung seret aoba electronic machine o vote agütsüba electronic machine najibo teyangludangyongi nüngdak meteta yanglur asünungji kenyongi balala asütsü. Aji oda, yimten telok aikati EVM meshitaki amshi asütsü ta aijaka, Election Commission of India-i parnoki amshiba EVM nung shingaia pei mulungba result angutsüsa kecha meinyaktetsü, ibaji tamakoktsü lir ta ajangajanga metetdakja aruogo. Ajisüaka, AAP, NCP aser CPI (M) ama yimten teloktemi EVM mashi amshiogo ta kanga sashia nokdak nungji, Election Commission-i parnok dang EVM-ji komakaser mashi amshitetsü ibaji sayutsü atema anogo atakzüktsü, ajisüaka iba anogo nung yimten telok shinga maru. Iba jagi Election Commission-i metetdaksüba toang shitaka ta metenogo. Iba denji ano EVM nung temeyong agi nemer vote enoktsüba dang masü saka iba kasaji paper nung ajenzüker adoktsü. Atangji, yimten telok shirnoki EVM dak temulung malemer, parnoka tamakok marem EVM aitsürba masü saka temulung malemtsüsa tulu liasü, kechiyong election mapangbo pei telok nungsa nübo teimba amato züngdangtetter saka vote azüngdangbo tangar teimba angur. Ibaji shitakba EVM tai asü mesüra nisung mulungjang tai asütsü (?) ta bilemdangtsü kanga nüngdaker. Asen lima ama sensaker teimba aliba lima ka nung, yimten temeten junga mangtetter atemabo, amtsük telong kajia tsüngrem amai lir. Ibayongji angateta liaka karibo timtem marem pei temeten yokdoker. Iba ama tia nung alirtemi, ashiko, mapang tonger senotsü mejimenuka nung tejak aser temulung melentsüa akok. Iba ama jagi sensakertem teti sensaka dang alir. Tanü item tia nungi nüji akümstüsbaji asenok asoshi kanga rongdak nüngdak kümogo. Atangji, vote enoktsüba yimya ya miima dang enoktsür asünungji shibai shiba nem enoktsüar memeteter, iba jagi vote mazüng tashibo shiba adoktsüar memeteter. Aji oda, kodang meimlaba nisung ka adokdir nisungtemi machine dak temulung malemtsüsbaji tim dang lir. Ajisüaka, joko tanü putu yimya agi mapa ajak electronics agi dang inyaksüsa yangluteta aka nungji electronics inyakyim toktsür akhi ama ballot paper nung teben agi nema vote agütsütsüsbaji putu tensa den mapet akümer. Ibaji gari anena yutsür tetsüng agi jajar amai asütsü. EVM amshia election agiba yagi election nung tim masüba inyakyim inyaksü aliba maparen aika nokdang aser ano vote azüngtsü asoshi kanga temela kümogo. Aji oda, tamalen shisemba ama nisungi dang yanglur asünungji Election Commission-ia ano maneni EVM amshiba ajanga nisungi temulung malem masütsüsa tali tajungba aser takangba inyaka aotsüla. Tangbo asenoki EVM indang jembir saka memenui EVM-a mamshii kidang mena yur kinunger ajunga internet ajanga dang online nung vote agütsütsü mapanga arutsü. Iba amaji alima aiendang asenoka tangatetba nung aientsüla aser yimten nung tangateter ka ama tebok aser tanü asoshi dang bilema masü saka tarutsü anogotem asoshi bilema shilem agitsüla. Tangbo asenoki EVM dak dang temulung malemer saka iba dang nungi shisabolutsü tulutibajibo asenoki asenok dak shingaia temulung melemtettsüsa aliba taküm ya asütsü.

# OLEMSABANG

## Tazüokba - Discipline

- Mrs Meyisongla, Rtd. Deputy Director Nursing,  
Kohima, Nagaland

Alemlü tsürabur sünglong külemba putu nung otsüla oboula nungertem ochishia aser kanga asüngteta liasü. Parnoki sünglong Tsüngremtem tsübuba agi, pei takümüji meraka asüngteta külem. Sü achirtemibo küm asem tashi anempong. Pei kenungtsü dena memedem. Yamaji masü nungbo parnok arishia malir ta amang. Alemlüba oda azüh nungi aruba ka mesüra sopetdangbet maso, parnok shi azü merüka aliba agi. Saka tanü asüngbo kibong aika nung sobettangbet tanur aika dang soa lir, aser ano taliang asotsü südi. Kechiyong tanü asüng lanurtemi achi ajem talisa yi, Drugs, Sali, moko tali achir aser tila asüdang nungi shi azü mazüoki seplepa senzür. Seplepa senzürtemi menaba tashidaktem syphilis-(Tatora) HIV/AIDS. Tanur menden aser nu asoba lenmang nung koma adoka aser azüh temenen nung bena asoba tanurji tesopet asor. Kibong lanu aika tanur masor. Aiür asüdang tanur bena aiben raksaa endokdang, tanur abenba lenmang nung komo adoka tanur mebenteter mesüra mendenji tali tilla (lose) akümba agi mabener. Ariena abenyonga matamabensa asotsü. Aiür ka taküm temerükji- tawa lu ali temo aliba lu mesük. Asunger ka taküm temerükji metsüjang tashi (major seeds) aser tarütsü maliba den saku. Tanur tajung bena asotsü atema- tawa lu ali temo tajung asütsüla- aser yangji metsüh jang tajung, tsüngküm mongpu shitak nung zünga jangratema meyia süngjang tajung atangtsü- item chirnurtemji tarutsü putu atema lanur tajungji asütsü. Chiajema aser seplepa alirtemi tanur tajungji masotsü. Ano shi azü kanga lanu nung bena asoba chir kodanga pur medemer menepa meintetsü. Tetsü aser tebu ka asütsüji küm 26 aser temabo asütsüla ta ashir.

### TAZÜOKBA

Tanur junga azüoktsüji sayutsüngiba kija agi masü, saka tsürabur tatishitsü taküm asütsüla(Living example). Medical science-i ashiba agi, tanur nem tazüokba training tajung agütsütsü tetsübok nung alidang nungi tenzük. Tetsüi mapang shitak amshia chiyongba, ajemba, mejangba, sakba, sarasademba, sentep senchii aoba, tepok aoba etc. Foreignerbo tanur bena alidang maternity coat balaka arüa asemer. Tanurji tetsü bok nung free süa lidaktsütsü atema(right position). Shisa mebului pelaa alibaji tanur kolok aser molungjang atema mozü tajungtibaji lir. Kenungtsü aser kenungbo tesendaktep tajung aliba ajak yagi tanur nem training tajung agütsür. Ano sor küm 0-5 ya kanga tongtipang, tanabubaji 6-10 years. Tetsüi tepima nung ajonger tanur azühba, ken atenba, sarasademba, jembishini aser tebu meima ajongshiba, tebu yimyatem agi tanuri angazüker. Tanur tetsür chanui-tetsü yimya chilu shi ayir, saka tebu temeimba, tebur chanui tebu chilushi ayir saka tetsü temeimba asür ta ashir. Kodang küm 10 ajonger parnoki ajak angateta arur aser tenaprongla kasasa meimer. Tanur küm 10 tashi nung parnoki angazüktsü ajak angazüadoker alir. Anungji küm 10 lirbo tanur sayutsüngi tesü ta shia lir, asüyonga parnoki mangatsü. Tanur bena alidang aser tanur lanuwa tebu yi jemer tetsü mezüngmeshia azükba, senotsü shidak magütsüba shisa buluji nür tanur dak keter asotsü/intettsü. Nür tanur tajung aginüra tsürabur anaprongla Tsüngrem meteta kanga kümdanga aser peisasa azüoka alitsüla. Tanü asüng alima ya kanga mesüngjem, japangmayim tulu, kibong, Arogo, yimten aser loktiliba ajak nung mangtettep aser meputepteter. Süra ya shiba tai ? Tazüokba mali tanurtemi tashi manga meinyaktsü inyakba agi lir. Kuliji kibong lanu chir, mesayu chir, teraksa kibong nungi, Tsüngrem memetet chirtemi makmakshishidaktsür. America nung tanur tim lenmang nung anitetsü atema Billy Graham dang tsüraburtemi tasüngdangba aika asüngdang. Pai Ap.shin 22:6 ya agi dang telangzübaji agütsür. Tanur ka pai aotsüba tim lenmang nung sayutetang. Kodang pa tain kümdir, iba nungi pa mepilatsü. Billy Graham küm 9 aser tenu Catherine küm 7 asüdang par tsüki tezülen tena moko chia angu. Tebu tena dang nena kechi achir ta asüngdang, kecha machir ta langzü, masü nena moko achir. Anungji kidangi odi ta jar oa tena nem yi bottle ka ka agütsür yi ya jemang ta ashi, tenati majem kangshia jemdaktsü, Billy=i ashi, yi kusakkusaker, nibo majemtsü ta ashi. Catherine-i ashi, yi nung sapon dang menemer majemtsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir**



## Longsa Baptist Arogo: Revival Mungjen

~ Longsa Baptist Arogo

**Okila:** Longsa Baptist Arogo madak Tsüngrem Tanela Temeshi Revival milak mekuploktür kum 50 ajungba tenung nung Tsüngremi inyakba mapatem bilemteta Pa sentsüwangshi asoshi nüburtem den iba sabang ajanga lemsateper.

American Baptist Missionary Union (ABMU) ajanga yokba Missionary Rev. Dr. E.W. Clark-i 1872 kum Naga tenem nung Khristan yimsü tenzüktü. Kum 75 junga Naga nung Khristanem tongmelang tamang agi ochi shia arogo anishia aru. Missionary C.E. Hunter aser A.S. Truxton tena lenisüba mapang 1948-1952 nung mezüngbuba Revival mopungsem Naga limai süi. 1947 kum Naga Baptist Church Association, koba tesülen ABAM agi melen, ibai tenteter kum 50 ajungba Jubilee amung. Idangji C.E. Hunter-i Naga arogotem tanela nung tekübok jenjang nung aliba indang kanga süoki ia, khuret nung jembia arogotem asentenshitsu asoshi sarasademtsü ayongzük. (Akümla Longkümer, Revival in Nagaland: Fact or Fallacy, tapak 27-28). Iba mapang 1952 kum Riküm (Mangmetong) Allahabad Bible Seminary nungi Theology zünger arua Ao lima arogo kar nung sayutsüngia jaja. Pai par Mangmetong arogo nung mezüngbuba sayutsüngi saka arogopuri pai sayuba magizüktet nung iba kum June ita nung Longkhüm arogoi tugua kasa osangji pai sayu aser aji aikati kanga junga agizüka mezüng revival mopungsemji tenzük. Iba tanelar mopungsem agi kongshitem rongnung lmkongtoshi aser Lanuwati tena pai anisemer tanaben Mangmetong yimdaki lua sentep agiba ajanga yimertem aika Tanela Temeshi agi pua revival adok. (Nagaland Christian Revival Church Longkhüm: Golden Jubilee 1960-2010 Nungo, tapak 13; aser Nüji Liyim: Mangmetong Baptist Arogo Centenary 1911-2011, tapak 41-46). Saka tia maka item kulitem ajanga iba revival mopungsem ya anenadok. Mezüngbuba nung ABAM-i Riküm indang tesayuba aitsü aser pa arogo nungi indok, (tesülenbo American missionary-temi pa tesayuba tendanga tai majitet nung tanaben arogo nung anioka Mungdang tenzükba nung shim). Tanabuba nung, 1950s nung Naga nüjiso bushiba tsüngkenpuya tulu ajanga arogo ka nungi kati osang abentsü tamakoktsü akümba den pei arogo nung tekülema magitetsüsa tensa ajurua mapang tatsüka tsüngda nung ibai remsepa oadok.

**Longsa nung Revival adokba tera:** Longsa Arogo 1916 kum April 2 nung tenzük kum 40 shi tongmelang agi amanga aru. Iba mapang Naga Nüjiso bushiba tensa jagi Longsa-a kongshia 1956 kum arem nung jenoka ali. 1957 kum Longsa nübur pei tasoli aser takaba rongsen ajak doktsür Ungma yimdak Grouping nung liasü. Yihuda nung Babylon tepokdak alidang, Yirusalem menungra par limai meyipa shilangdakjang ta Kibuba dang nüktzü yima ayimtenba ama, iba tia nung alidang Longsa nungeri Tsüngrem dang kukua yamai sarasadem, "Nai dang onok ozü tasoli bushia yokra onoki Nü den jajatsü aser Nü tsüngdang tesembatsü ajak doktsür; Nai mulungba inyaktü." Iba Grouping nungi shilangdang yimti yimdang arem agi meipanger joko ali rongsen ajak ali kumadokba den temoatsü süitemba agi kum ishika alu junga maru nung sensak tia ajurua aya wara aru. Iba ama tuoshi tulu nung alidang Tsüngrem kulemtsü Tenla Ki tuluba tasen yanglutsü mapang tonga aru, aji saka, Grouping mapang bendang lima alidang parnoki Tsüngrem dang kukua sarasademba aser Pa dang nangzükba nungi masetshi-i, pei atema bilemba doktsür Tsüngrem asoshi mezüngbuba bilema Tenla Ki süa tenzük. Iba tensa nungjisa ano temeket aliba kintem den aiben mepetmesü ataloka liasü. Item tia nung tetsürtemi kiyong shia nung sarasadem tesep tenteta Tsüngrem dang alima aneptsütsü asoshi temulungjang nung tzüraa, tanungba ola agi khuretsa aben. Ibai revival adokdaksüba tera rongnung ka liasü. (Lungchilung, Longsa Baptist Arogo Kum Noklang Jungmung Otsü Kaket, 2016, tapak 17).

Iba tia nung Arogo Kum 50 ajungba Jubilee 1965 kum amung. Idangji arogopuri Tsüngrem mapa koda tuluba awaa oa inyaktü ta mangdang meshia maneni sarasadema alidang, 1966 kum Febuary ita 12 nü Riküm (Mangmetong) Longsa arogoi arua Bible study agütsü. Iba mapang pai temenen nungi pilatsü, moko sali aser yi ajemba doktsütsü, tanaben asotsü aser kotak molumi indang tesayuba agütsü. Ibai revival metsüjang prokba ka mesüka liasü, kechiaser iba Lai tesayuba agütsüdang tzüraa alidang tzü jemdaksüba ama aikati pa tesayuba agizük. Item rongnung Pastor lmkoraba kinungtsü lmsürenlai Febuary 18, 1966 nung temenen tatokba angu aser iba sülen Arogotsür Tesayula Masarenla-ia kasa oji ashi. Tekümna 1967 meyi mapang tetsür telok ka yangyu (yangtepa inyakba telok) tenteter alu inyaktepdang June 30 nü adianutsür Kikümsüngla w/o Masalepden lu nung Riküm-i taoba kum sayuba bilemteta iba nü nungi parnoki moko sali machitsü aser tangar nung masentsü mulungteta telemtetba agi. Ano tambur telok katia kasa telemtetba agia achi ajemba temenen doktsü. Ibai tesüngmangtsü temenen tongpang akokba ka liasü, koba nungi Tsüngremi mapa inyaka taküm melenshitsu tenzük. (I. Yabang, Asendenshi Milak, 2005, tapak 9-11). July 1 nungibo item yangyur alu tongli moko sali achitsü melena tamasa ken ka tena sarasadem wadangi ao aser wadangk tangar nung asentsü melen nisung shiai pei taküm nung atalokbatem aser Tsüngrem o lemsateptsü tenzük. Tetsür yangyur telok kaji taküm melenshir tangar dang meshitetba tepela agi parnok temulungjang sünga taküm liyonga aodang parnok maparenji ngua, yimertem parnokji yiar telok ta shia atala menütsü. Tia ka-a item telok rongnung Masarenla Tesayula aser Pastor kinungtsü lmsürenla densema aliba ajanga tenati par telok nem Lai tesayubatem agüja angatetdaksü. Iba kum nungibo yamaji kija, kibong, lokti aser Arogo nung tanelai jungkai adoka mapa inyaktü tenzük meso. Saka alimai iba mapaji Yimsü tasen ka tenzük ta bilem. Anungji shiri iba yimsü agizüka amangdir sen achitsü, aser yimdak melidaksütsü ta renema amokmeren, saka Tanela Temeshi Pa mapa inyaktü tenzük doker liasü. Anungji Tanela mapaji kecha tashi ozüng agia mesongdemtetü aküm. (Longsa Baptist Arogo Platinum Jubilee Lipok Otsü 1990, tapak 8)

(Maneni taruba adok nungi...)

## Jerusalem Breakfast Initiative nung Khristan lennir 200 adener

**Jerusalem, June 7 (Agencies):** 200 shi jaokba nung Adaktusson ashi. Israel tir Reuven Rivlin-i dena lir.

Israel tir Rivlin ya putu tenetbuba Jerusalem nung lir aser pai tesentepertem dang Jerusalem nung yimjung alitsü atema sarasademjang ta mepishia metetdaksü. "Nenok ajak Jerusalem nung yimjung sarasademtsü atema Israel-i aru" ta Christian Allies Caucus tir, MK Robert Ilatov-i ashi.

Tawa UNESCO-i Yihuda nung Temple Mount den sendaktepa mali ta lemtetbaji Laishiba anema lir. Jerusalem onük atema asenok longjemtsü mapang tonggogo, ta Ilatov-isa

## Bono-i Jimmy Kimmel Live nung tekülem ken aten

**Los Angeles, June 7 (Agencies):** Jimmy Kimmel Live sentong nung kentener Bono aser U2 teloki "I Still Haven't Found What I'm Looking For" ken aten.

Taoba mapanga Bono-i pa Khristan tamanger asüba indang jembia aruogo aser pai Khristan

music nung tali ochishia atentsü ayongzük arur. Yaküm U2 kentener Bono-isa Eugene Peterson den yaritepa Psalms indang film ka yanglua liasü.

U2-i atenba ken aika Khristan tamang nung ajemdaker lir aser kentem

## ANOGO ABEN TSÜNGREM DEN

### AJEMALUR TAKOK. 1 PETER 2:17-25

Ni tashioktsür dang masü, saka ni ashioktsüko. Kü mulungjang tembar ka lir shibai ni tiazülen asayar aser ni tsünü nem agütsür. Süra kechi? Ibai dang, ni kü kibur taochi jilu ajizükla aser pa dang angatsüla.

Idakji meyipa mang mayangtsüla. "kodang parnoki pa atala, pai meyipa magütsü" mang ayangba mi jagi kü tsükchir arongtsü akok, saka iba yagi kü tanela nung tali rongga ni tali raksatsü akok. Mang ayangba shia nung kija taküm nung senti rongsen ya jenjang agi malizütetba tanelaji matsük tashi jangrutsü makok. "nü tsükchir atema miji na yirusüsa kanga tsüka tapu."

Taküm tsüngrem nem bendanga agütsüba tenangzükba tashi ita ayutsüla. "Pai pa sasa shibai o bendanger pa nem bendanga agütsü. "Asenoki tanela nung teraksa yur saka zülü agi akhüm tsübur. Asenoki Kibuba kangki nung angenloktsü agütsü, saka temeshi amabo sayur. Asenoki tema nung asenok maksü mapa nungi jenbuttsü kulem ketja ajak nung atener.

Kü nela, tekümdangtsü ajak angang aser "tasü tait nisung süang."



Alongkima Baptist Arogo nung 4th June 2017 anogo Mr. Sentiyanger Pastor Tsüngrem tenzükba mapa nung pa aser par kibong ajungai taküm piyong Tsüngrem tenzüktsü temulungtetba aser tenangzükba tulu nung Ao Baptist Arogo Mungdang(ABAM) ajanga Ordain sütsüogo aser tanü nungi pa dang Rev. Sentiyanger ta ajatsü sangdongogo.

ABAM ordination council item ya ajanga pa ordain sütsüogo: Rev. Ponen Longchar, Pastor MTBA, (Chairman), Rev. T. Yanger Jamir. P. R. O. Clark Theological College, Rev. S. Emna Tzüdir, Pastor Changki Baptist Arogo, Rev. C. Temjen Home Missionary Chungtiayimsen Baptist Arogo, Rev. Ayutemjen, Pastor Dibua Baptist Arogo.

Rev. Sentiyanger ya Alongkima nung soa intetba Waromung nung senso tajung ka tsürapur Temsumayang aser Lt. Imtikala dena jabaso lir. Pa kinungtsü Mrs. Moayangla aser dena nem jala asem(3) Aochila, Yachetla aser Kibenla Longchar moaja lir.

Tsüngremi Pa wadang asoshi par kibong maneni moajangma. Arogo tenung nung

Sd/-

N. Tali Longkumer  
Secretary

Deacon Board

## US yimsüsür kati 'Islamic kiralongraba' anema Temeshi rara raratsü ayongzük

**Washington, June 7 (Agencies):** US nung tepsettsüla. Pa/la anema ken o benoka mangadangtsüla, bushisüngdang mapa kecha meinyaktsüla saka temulung melemi bilemra, indangindanga tepsettsüla, ta paisa ashi.

Louisiana nungi Congress züngsem, Clay Higgins-i pa indang Facebook page nung "Islamic ta temulung melemi bilemer shia bushitsüla aser tepsettsüla" ta ashi.

Islamic kiralongrar ta metetdaksü.



### SENYONG NÜ SENTI VOTE TEYOKMA

TANÜ ASEN LIMA NUNG  
TEMENEN AJAK DERAJI  
SENYONG VOTE AYOKBA YA LIR.

**OLONG PAITEP # 4444**

1		2					3		4	
5			6							
							7			
					8					
	9						10			
										11
12			13							
					14			15		
			16							

**TIPIEN**

- 1. Awashi - (8)
- 5. Tzü yimdendak - (6)
- 7. Shirangdang achiba - (4)
- 9. Tetsüng majung - (9)
- 12. Mimiimshi ashiba - (4)
- 14. Temokoki ali nung nendak - (6)
- 16. Tetsüng sobotsü - (8)

**LANGTSÜNGLEN**

- 1. Aotsür akümer kibong dang ajaba - (5)
- 2. Itsük ajensar akongba - (3)
- 3. Per tulu ka - (4)
- 4. Ako / Ata - (6)
- 6. Asüng sür aliba anogo - (4)
- 8. A \_ \_ \_ ti - (3)
- 9. Mezüngbuba sülen / Tanabuba - (6)
- 10. Meshiyonga ao - (4)
- 11. Mesüi aliba - (5)
- 13. Süngo tou metsükzük - (4)
- 15. A \_ \_ \_ a - (3)

**OLONG PAITEP # 4443 TELANGZÜBA**

**TIPIEN :**

- 1. Yimlibilem, 4. Onük, 5. Tenyar,
- 7. Aya, 8. Atong, 11. Sar, 13. Lemjem,
- 14. Oagi, 15. Molusongzü

**LANGTSÜNGLEN :**


- 1. Yongya, 2. Maka, 3. Marok,
- 5. Teronem, 6. Nung, 8. Amaj,
- 9. Jangzü, 10. Salem, 12. Rong



**AZÜMESEN ALOKBA :**

Hi!!! Alok, kechiba na yamai azümesener, kidang mapa kecha meinyaker aser lesson-a junga mazünger, süra naia küm nung koba ita temeimtiba?

Oba, nibo na.... küm nung ita trok tangalen tesem repranga jaja senzür arua tanüngba ita trokji kidang kazüa dang linür!!!!



Lilir : KK, Dimapur

**TANÜBO NAI LANGZÜANG**

Q. Alima nung mezüngbuba 'United Nations Oceans Conference' koba linük nung June 5, 2017 nungi anogo pungo tashi mongdagi?

- [A] France [B] United States
- [C] Germany [D] United Kingdom

(Taruba adok nung onoki langzüksü)

YASHI ADOK TELANGZÜBA : Real Madrid

**Tepela Tasoba Anogo**

Tanur asoba anogo nung salem osang den noksa angali adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim bureau tem nung agüjang.

1. Tenüng : \_\_\_\_\_

2. Tasoba anogo: \_\_\_\_\_

3. Küm : \_\_\_\_\_ 4. Class : \_\_\_\_\_

5. School : \_\_\_\_\_

6. Talidak : \_\_\_\_\_

7. Salem osang : \_\_\_\_\_

**NAIA YA METETER MA**

**SINGLE-WOMEN PENSION SCHEME**



India kübok Telangana state sorkari 'single-women pension scheme' ta ser tetsür nem teyari sen agütsüba sentong ka tawa tenzüksüogo. Iba mapatong nung tetsür shia nem ita shia teyari sen Rs. 1,000/- agütsütsü. Iba mapatong nung züngsemtsüpurtemji tetsür kibong mekümi alirtem, tetsür shirnok talisa Dalit tsür pei tekülem kidang kibong mekümi alitsü tsüraburtemi yokba aser kinungbu den balar alirtem nem iba maongkaji agütsütsü. Iba teyari agütsütsü atema ketdangsertemi District 31 nung tetsür 1,08,302 tashi shimteta lir.

**SUDOKU # 3557**

5	9					3		
	6	4		8				
7	8	2		5		9		
	2		5	7		4		
	5						2	
9	7	6	4					
				3	9	2	5	
2	1				8	3		
		5	2	6	9			

**TELANGZÜBA # 3556**

2	6	1	7	8	5	3	4	9
7	9	4	3	1	2	8	6	5
5	3	8	9	6	4	2	1	7
1	2	3	5	9	7	6	8	4
6	8	9	4	2	1	7	5	3
4	7	5	8	3	6	9	2	1
9	4	6	2	5	3	1	7	8
8	1	7	6	4	9	5	3	2
3	5	2	1	7	8	4	9	6

**OJANG LUTEP # 4052**

- LANNAGAD :
- NGNU :
- ATOMAPNG :
- ALABLA :
- ZÜKTENA :
- AYUSTSÜ :
- SAAK :
- APMA :
- MABKÜO :
- EINYMAKER :

**OJANG LUTEP TELANGZÜBA # 4051**

NAGALAND NUNG SÜNGDONG KWIKA LEPOKDIR  
PAIKAJI ATEMTSÜ MERANG NUNGA JUNGLA



Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



**Aries**  
21/3-19/4

Tanü nai mapang kanga junga lemsatsü merangang. Nai mapa kara inyakba ajanga tanü na tajangzük balaka mangutsü südi.



**Taurus**  
20/4-20/5

Tanü nai mapa meranga aser tangar dang talangba inyaktsü bilemstsü. Saka nai mapa kara inyaker anisüngzüksü merangang.



**Gemini**  
21/5-20/6

Tanü nai mapa inyakba dang o jembiba nung mapang timba indoktsü südi. Saka nai mapa nung atsüngzükta alitsü mebilemstsüla.



**Cancer**  
21/6-22/7

Nai tanü nü mapa kara inyaker kidang oa anisüngzüksü bilemstsü. Saka nür kidanga na asoshi mapa peria alitsü südi.



**Leo**  
23/7-22/8

Na anasa aliba nisungtem dang mapa tali inyaktsü ajungshitsüla. Nü mapa kara inyaker anisüngzüksü mebilemstsüla.



**Virgo**  
23/8-22/9

Tanü nai tebenja aliba maparen kar ajurutsü südi. Saka nai iba amala mapa inyakdanga lir, anungji na asoshi balaka tasak masütsü.



**Libra**  
23/9-22/10

Tanü nai mangatettep kicha majurutsü, anungji nü mapa nung temolung agüjang. Aser nü mapa nung takok angutsüsa meranga inyang.



**Scorpio**  
23/10-21/11

Mapang tali indokaka, nai jangraba mapa kar tanü inyaktsü merangang. Nisung kar asoshi pei jangraba mapa inyaktsü maongka tajung angutsü südi.



**Sagittarius**  
22/11-21/12

Na mapa inyakba tesem nung tanü anogo junga mesüyitetsü akok. Saka nai akok tashi nü mapang junga amshitsü merangang.



**Capricorn**  
22/12-19/1

Nü inyaksangshi nung tangari reprangba indang bilemra nai mapa kara meinyaktetsü. Anungji nü mapa sadok-sadoka inyang.



**Aquarius**  
20/1-18/2

Nisung ajaki mapa meranga inyaktsü. Anungji nü mapa nung mapang tali meindoktsü aser anisüngzüksü asoshi mapang talangba yuang.



**Pisces**  
19/2-20/3

Tanü nü mapa temer anisüngzükang. Saka na anisüngzüksü atema bilema mapa kara inyaktsü merangra nai tangar memeneptsü südi.

## Anupam Kher-i taruba film nung Manmohan Singh shilem agitsü



**New Delhi, June 7 (Agencies):** Sanjaya Baru kaket 'The Accidental Prime Minister: The Making and Unmaking of Manmohan Singh' nung ajemdaker film yangluba nung Anupam Kher-i taoba PM shilem agitsü.

Osang ka ajanga ashiba agi, iba movie ya 2019 Lok Sabha election madongtsüngda 2018 küm December ita sayatsü. Baru ya Singh indang taoba

media advisor liasü aser pa indang kaket ya 2014 general election madong tsüngda sayaa liasü.

Kaket nung Baru-i ashiba agi, Manmohan Singh ya Congress party aser party chief Sonia Gandhi-i amokbanger ayu. Lai Cabinet aser Prime Minister Office atema tongtibang appointment tem ajak telemtetba agia liasü kechiyong pai, la aser UPA

government nung parnok pusemertemnem parnok molung dang südaksü amai ajiteter. Baru ya 2004 aser 2008 tsüngda nung media advisor liasü. Pai ashiba agi, Centre nung tashi ana külemi alitsü makoktsü, ta Singh-i pa dang ashi.

Iba movie ya Sunil Bohra-i produce asütsü aser Vijay Ratnakar Gutte-i direct asütsü. osang ajanga ashiba agi, screenplay ya National award-winning director Hansal Mehta-i zülu. Bohra-i ashiba agi, iba film ya Richard Attenborough indang Oscar akokba film, 'Gandhi' dang nungi mera taketba asütsü.

"Iba film atema bushisüngdang tembangogo. Film nung tanungba shilemtem atema nisung shimtsü dang anunga lir," ta Bohra-i ashi.

Kher-i iba film nung shilem agitsüba jangjatsüogo. "Tanüasüng nisung indang shilem agitsüji kanga tasak lir, kechiyong ajaki medemdangtsü. Ajisüaka ni PM Manmohan Singh shilem agitsü asoshi yongya atar," ta pai osangbenertem dang ashi.

## Piers Morgan-i Ariana Grande dang tatok meshi

**Manchester, June 7 (Agencies):** One Love Manchester benefit concert nung Ariana Grande school tanur ka jeba aliba mesüzükba ngur TV personality Piers Morgan yimjak nung Ariana dang tatok meshiogo.

Anogo ishika tejakdang May 22nü Manchester Arena nung Ariana kentenba sentong tembangba sülen suicide bomber kati bomb ka pokdakja nisung 22 tepsetba sülen Grande US-i oadokba atema Morgan-i la aija liasü. Pai ashiba agi, la iba lendong atalokli kidangi meyipa moi yirur alirtem mozüki nung semdangtsü asü.

Ajisüaka Hombarnü pai kentener ya junga memeteti aibelena aitsü ta shia Twitter



ajanga tatok meshiogo, ta osang ka ajanga metetdaksü.

Pai yamai zülutsü, "Ni na mangateti aitsüogo aser iba atema ni tatok meshir. Na kanga dang ajaki saputsüsa yimya aketba tetsür ka lir aser iba aonung ya kanga dang jangratemsü aketba

aonung ka lir."

Grande June 4 aonung nisung 50,000 shi sentepa aliba jakdang tanga nungtugu kentenerem aser local school choir ka den shilem agiba mapang tetsür chanu ka jeba aliba lai mesüzükba ngua ajak molung pua.



June 5, 2017 nü New York City nung aliba SiriusXM Studios nung actress aser kentener Selena Gomez (abelen nungi tanabuba)-i SiriusXM Hits 1 Channel nung "The Morning Mash Up" indang 'Celebrity Session' nung shilem agiba sülen agiba noksa angur.

## TAN HOPTA ATEMA - KOMA SÜLA ?

Q Nagaland nung tzü mopong merükteta yunüba temaitsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla?

Olong 20 shi nung June 09, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobar nü adoktsütsü.



# Metal Hammer nung Black Sabbath-i 2017 Golden Gods sempet agizüksü Honor 6X sen 2000 tashi agi tajemba kümogo



Black Sabbath (File photo)

**June 07, 2017 (Agencies):** Hombarnü (12.06.17) agitsü aliba 2017 Metal Hammer Awards nung Black Sabbath-i Golden God sempet agizüksü. London IndigoO2 nung aliba The O2 nung Orange Amplification den külemi ayongzükba sentong Hombarnü agitsü aliba nung iba Golden God Award ya par telok tenüing nung gitar atemer, Tony Iommi-i agizüksü.

'Paranoid' telok nung ya arishi küm 69 tain, Tommy den ya Ozzy Osbourne aser Geezer Butler lir aser iba sempet tulu ya par telok sapur nem bendanga agütsür, ta Tony-i ashi.

"Iba sempet agütsüba asoshi

kanga pelar. Küm 50 jungnüaka Sabbath ya tang tashi nüburtemi sapuba aser ken otsü nung tongtibang shilem ka lir, ta angudang kanga jangratema bilemer," ta pai-sa shisem.

"Onok sapurtem mapang talangka onok den aliba asoshi pelaba ni shinür, nünok melira Sabbath ya malitsü asü," ta gitar atemer mongin, Tony Iommi-isa shisem.

Sabbath ya 'heavy metal genre' tenzüker ka lir ta züngshir.

Black Sabbath tenzüker küm 50-shi nung parnok indang kensep million 75 dak tali yokogo aser iba telok ajanga Slash, Guns N' Roses, James Hetfield aser Metallica

teloktem ajungmeso.

"Black Sabbath ya heavy metal atema 'Ground Zero' lir. Parnok mali asübo asenoki tanü meimba heavy music ya melila, aser iba ama benjungmong tulu nung parnok nem tetushi agütsütsü tetemsü ta ni bilemer. Hombarnü, June 12 atongtsü matateter," ta Metal Hammer magazine yim o zülur, Merlin Alderslade-i ashi.

Taküm Metal Hammer benjungmong ya Fozzy indang frontman aser WWE nung nungtugu asayar, Chris Jericho-i ketdangsüa anitsü aser Mastodon, Clutch, Avatar aser Orange Goblin hungeri sentong nung shilem agitsü.

**June 6, 2017 (Agencies):** Honor, Huawei's e-brand-i tanü parnok indang oneline smarthphone; Honor 6X jenjang India nung ajemba sangdongogo. 2017 June ita 6 nü nungi tenzüka sen 12,999 (32GB) aser 15,999 (64GB) agi ngua aliba Honor 6X phone sen 11,999 (32GB) aser 13,999 (64GB) agi angutsü.

India nung Honor 6X smarthphone ya tapu ana nung angur. Ka 3GB RAM, 32 GB ROM version nung sen jenjang 11,999 angutsü aser tanabubaji 4GB RAM, 64GB ROM version sen 13,999 agi angutsü.

Honor 6X nung tongtibang USP kaji dual-camera setup alitsü. Iba phone nung primary camera ana keta lir, ka noksa tangoktsü asoshi 12-megapixel sensor aser tanabubaji noksa nung effect agütsütsü asoshi 2-megapixel sensor keta lir. Iba ajanga Honor 6X phone-i Honor 8 aser Huawei P9 phone tem ama noksa tangokteter.

Phone nung 5.5-inch Full HD display keta lir aser unibody metal design nung angutsü. Maneni phone nung battery tashiji 3,340 mAh lir aser sim ka dang amshiteter.

**JTTN PRESENTS**  
**CONFLUENCE**  
 MUSIC, FASHION, DANCE, COMEDY, CUISINE  
 "An evening presenting the best of Naga Artist to Mokokchung"

**FEATURING:**  
 -ALODO NACA  
 -MOANUNGTANG  
 -SAMADO  
 -SIOPONG NACA  
 -WAPANG LONGKUMER  
 -TIAMEREN JAMIR  
 -LIMATANGEE  
 -INYE LONGKUMER  
 -RAMOKLA PONCEN  
 -SOUL SISTERS  
 -POPCOIN DANCE CREW

Venue: Town Hall  
 Date: 16th June  
 Time: 6PM

Mokokchung, June 07 (TYO): ITTI ya Mokokchung nung aliba takotet lanurtemi tentetba lir aser item lanurtem ajunga longjemer iba Confluence sentong ya Mokokchung nung mezüing ayongzüka alitsü. Iba sentong ajanga Naga nunger sempet balala aketer aser lanurtem nem sapang lapoktsür. Iba sentong nung adentsü asoshi ticket ya venue entrance nung angutsü. Anungji nüburtem ajunga arua iba kenten menü, fashion, tsüingsang aser chiyongtsü balala indang sentong nung shilem agitsü ayongzüker, ta sentong ayonger temi osang ka ajanga sangdong.

## OnePlus 5 camera Indai nung June 22 nü sayatsü



**June 7, 2017 (Agencies):** OnePlus 5 phone India nung June 22 nü sayatsü asoshi renema aliba osang ka ajanga metetdaksü.

Osang ajangsa ashiba agi, iba phone nung Qualcomm

Snapdragon 835 processor aser tesülen camera nung dual-lens keta lir.

Maneni OnePlus 5 phone indang jenjang tejangja memetet saka sen 30,000 dak tajemba asütsü imlar. Olulu

osang ka ajanga ashiba agi, OnePlus 5 phone nungya 5.5-inch display, teselen camera 23MP aser tejaklen camera 16MP keta alitsü imlar. Maneni phone nung battery tashiji 4,000mAh aser 64GB inbuilt storage den 8GB RAM alitsü imlar.

Company ajanga phone sayatsüba anogo sangdongba den külemi phone tasenba indang noksa ka Twitter ajanga sayua liasü. Maneni OnePlus phone tasenba nung horizontally stacked dual rear camera setup ka alitsü imlar.

## Apple iOS 11 update iPhone 5 aser 5C nung makoktsü

**California, June 07 (Agencies):** Apple indang iPhone nung amshitsü atema operating system tasenba iOS 11 ya sayaba sülen iPhone 5 aser 5C mesüra iPad 4 nung mamshitetsü. iPhone tejentem nung software mesüra security update asütsü makoktsü.

iPhone 5S aser tasenba device tem nung operating system tasenba inoktsü akoktsü saka iba sülen app tejen karbo amshitsü makoktsü, ta osang ajanga ashi.

Apple-i 32-bit processor amshiba device nem teyari magütsütsü lemtetba sülen iba osang ya sangdong.

2013 küm nungi tenzüka Apple ajanga 64-bit processor aketba device dang yanglur aser iba processor tasenba ya iPhone 5S aser iPad Air nung mezüing inoktsü.

32-bit amshiba app tem ya App Store tasenba nung bushinunga mesayutsü, ta ashir.

64-bit processor ajanga mapang ka nung data aika amshitetsü - 32-bit processor dang billion pezü ben aki tekeraba - aser iba ajanga iba phone system takaraba akümtsü.

"64-bit hardware amshitsü osang ya küm aika tejaklen nungi metetdakja aru saka customer aikati memetet amai dang yutsür. 2015 küm nungi update masüba app tem dang amshitetsü," ta uSwitch.com nung nung telecoms expert, Ernest Doku-i ashi.

Apple ajanga 2016 küm October nung iOS 10.1 sayaba mapang update sür aliba device nungi 32-bit app lapoktsü merandang iba inyakyim ajanga iPhone tenüshiba kümdaktsütsü, ta message agütsü. 64-bit nung mamshitetsüba app tem putetsü asoshi oset keter iOS 10.3 lir.

App amshitsü makokba tem ya reprangtsü asoshi Setting > General > About > Applications > App Compatibility nung angutsü.

Apple ajanga Mac nung aliba 32-bit ya toktsütsü tenzüko go aser iba Mac OS High Sierra ya 32-bit amshitetba device tatembang asütsü, ta WWDC nung metetdaksü.

2018 küm June nungi tenzüka Mac app store nung inokja aliba app tem agizüksü asoshi iba device yagi 64-bit support sütetsüla, ta osang ajanga sa ashi.



New Delhi, June 7: Bodhbarnü New Delhi nung 'Jattu Engineer' film takok anguba atema party amongba mapang tamangba yimsü nung lenir Gurmeet Ram Rahim Singh (teyong) aser tangartem tangokba noksa nung angur.





New Delhi, June 07, 2017: Bodhbarnü Sarojini Nagar, New Delhi nung Urban Development, Housing & Urban Poverty Alleviation and Information & Broadcasting Union Minister, M. Venkaiah Naidu-i DAVP indang "Saath Hai Vishwaas Hai, Ho Raha Vikas Hai" Exhibition lapoktsüba sülen sema senzüba noksa nung angur. Kasa noksa nungsa Minister of State for Information & Broadcasting, Col. Rajyavardhan Singh Rathore-a angur.

## MP, Mandsaur nung aluyimertemi longkak tesashiba aitar

**Mandsaur, June 07 (Agencies):** Madhya Pradesh, Mandsaur district nung aluyimertem longkak tesashiba aita gari 10 rongdoktsüogo.

Longkak aiter aluyimertemi Madhya Pradesh Chief Minister, Shivraj Singh Chouhan jaoka takhangba agütsüdang parnoki Mandsaur district Collector aser Superintendent of Police den raratepa liasü.

Madhya Pradesh nung aluyimertemi parnoki züsentetba aonsotsütem nung sen tutsütsü aser aluyimertem sentsüh atoktsü atema takhangba agütsür.

Yashi aluyimertemi item takhangba agüja longkak aitar police-i injang yoka aluyimer pongu kaset aser ti yiruja liasü.

Longkak aitertemi, police-i parnok dak injang khaloktsü ta aitsüba sülen iba tatalokbaji judicial-i bushisüngdangtsü atema tetuyuba agütsüogo.

Item tatalokba sülen Mandsaur, Ratlam aser Ujjain

nung internet service anentsüogo aser curfew ozüing benokogo.

Iba tatalokba dak sendakba nung tanep Chief Minister Chouhan-i phone ajanga Bharatiya Janata Party (BJP) Tir, Amit Shah dang Mandsaur tensa osang metetdaksüogo.

Ano külen tanga osang ka nung, Congress Party-i, aluyimertemi parnok dang sentsüh atoktsü takhangba agütsü, ajsüaaka BJP-i parnok dak injang khaloktsü, ta aitsü.

Congress-i, Shivraj Singh Chouhan-i aniba BJP sorkari election mapang nung nangzükbatem meinyaker, ta aitsü.

Tanü New Delhi nung osangbenertem senden ka nung jembidang Congress otongdar Abhishek Manu Singhvi-i, "Nenoki Congress anemtsü jangraba ajanga aluyimba sector amatokogo," ta ashi.

Shivraj Singh Chouhan-i aniba Madhya Pradesh sorkari election mapang nung nangzükbatem amatokogo, ta

shia Singhvi-i, India nung aluyimertem longkak aitar züindar, ta ashi.

Mandsaur nung aluyimer pongu kasetba dak sendakba nung Singhvi-i, "DD Kisan TV nung parnok longkak aitar ya sayur ma? Aluyimertemi parnok züsentetba aonsotsütem nung jenjang shitak akhangar, ajsüaaka BJP-i parnok takum agi. Aluyimertemi sorkar dang parnok sentsüh atoktsü akhang aser BJP-i parnok dak injang khaloktsü," ta ashi.

Congress lenirisa item tatalokba dak sendakba nung Ato kilonser, Narendra Modi-i ola madoker, saka yoga indang ang twitter ajanga lemsateper, ta aitsü.

Mandsaur semdangtsü atema Congress Party tatong Tir, Rahul Gandhi nem temelaba magütsüba aija Singhvi-i, "Rahul Gandhi densema nisungtem iba tesem jagi oa mangyimer kibongtem den tejashi lemsatepnüa liasü, ajsüaaka parnok nem temelaba magütsü," ta aitsü.

## Sept 16 nungi Oct 15 tashi nung Congress tongti lenirtem shimtsü

**New Delhi, June 07 (Agencies):** State aika nung assembly election agütsü lia aser Lok Sabha election agütsü küm ka ser tesadang shi dang lia taküm October ita nung Rahul Gandhi Congress Tir akümtsüa akok.

Party tentet election atema

Congress Working Committee-i agizükogo, aser September 16 nungi October 15 tashi ita ka piyong internal election agia Congress Tir, state Tirtem aser state tentettem shimtsü.

Aji oda süra Congress putiotsü nung Sonia Gandhi küm

18 tashi Congress Party Tir inyakba sülen la menden nungi alua lar jabaso Rahul nem maongka agütsütsü.

2014 küm Lok Sabha election nungi tenzüka Congress-i Punjab dak alaka election ajak nung tamakok ngua arudar.



Lucknow, June 07, 2017: Bodhbarnü Lucknow nung International Day of Yoga 2017 (June 21) jeli sentong ka nung Uttar Pradesh Angh, Ram Naik, Uttar Pradesh Chief Minister, Yogi Adityanath, Uttar Pradesh Deputy Chief Minister, Dr. Dinesh Sharma, MoS (Independent Charge) AYUSH Ministry Uttar Pradesh, Dharam Singh Saini, Swami Ramdev aser Swami Bharat Bhushan nung külemi tangokba noksa nung angur.

## Sorkar tetuyuba anema Supreme Court nung ken o benok

**New Delhi, June 07 (Agencies):** Centre-i shiruru market tem nungi tepsettsü atema shiruru ayoktsü mesüra alitsü nokdangba tetuyuba anema Bodhbarnü Supreme Court nung ken o ka benokogo.

Iba ken oji June 15 nü angadangtsü ta Supreme Court-i metetdaksü.

Iba ken oji Justices Ashok Bhushan aser Deepak Gupta nati akümba vacation bench matsüngdang benok.

Temepishiba ken o benoksang jagi ashiba agi, Centre tetuyuba nung ozüingtemji linük temzüng den mapet, kechiyong item ozüingtemji jagi, tamangba yimsü sadoka bentshütsü temeten aser aayanga takum alitsü temeten densema fundamental temetentem anemer.

Kasa temepishiba nung, taoba ita sorkar tetuyubaji "tamangba yimsü dak sendakba nung shirurtem tenlaba anema lir" aser achitsü atema shiruru tepsetba nokdangbaji ajanga

Linük temzüng nung sensotem nem agütsüba chiyungtsü temeten aser nija temeten alema inyaker, ta shia lir.

Temepishiba nungjisa ashiba agi, Kerala, West Bengal, Tripura aser Karnataka state temibo Centre tenokdangba tashi mangatsü, kechiyong iba jagi parnok shishilembaba maparen nung kongshitsü ta shiogo.

Hyderabad yimti nung alir Mohammed Abdul Faheem Qureshi tenung nung advocate Sanobar Ali Qureshi-i agütsüba temepishiba nungji, "Achitsü atema shiruru tepsetba aser tamangba dak sendakba nung tenla agütsütsü atema shiruru tepsetbaji item teloktem sobaliba maitsü lir, aser ibaji India linük temzüng Arlla 29 kübok kümzüka lir," ta ashi.

Paisa, "Shiruru aliba mestüra ayokba khenyongi nokdangba ajanga aluyimertem aser shiruru s h i s h i l e m b a r t e m i rongsenkettsüing nung khuret tulu ajurutsü, ta ashi.



June 07, 2017 nü New Delhi nung aliba Lady Hardinge Medical College nung 'Vatsalya - Maatri Amrit Kosh', National Human Milk Bank & Lactation Counselling Centre semzükbata sentong nung Health & Family Welfare Secretary, C.K. Mishra-i award lemtsüba noksa nung angur.

## Opposition teloktepi tamakok angutsü: Naidu

**New Delhi, June 07 (Agencies):** Bodhbarnü Union Minister, M Venkaiah Naidu-i, Opposition party temi BJP anema lokteptsü merangbaji tamakok angutsü, kechiyong lenir asütsü onük nung parnok melongjemtsü, ta ashi.

New Delhi nung osangbenertem den jembidang Union Information & Broadcasting Minister, Naidu-i, "Kin aser tamangba lokti nung telemsa adokdaksürtemi Modi (Ato kilonser) tsübur, ibayongji parnoki pa anema osang tai proktsü tenzüka," ta ashi.

Paisa, opposition party temi Centre sorkar anema nüburtem dang osang tai proktsü maparen tenzükbaji tamakok angutsü, aser parnok dangisa meyipa arutsü, ta ashi.

National jenjang nung BJP anema opposition party temi lokteptsü merangbaji tamakok angutsü ta shia Naidu-i, "Lokteptsü atema merangba

ajakji tamakok angutsü. Kecha mataloktsü," ta ashi.

Taoba mapangtem nunga BJP anema National front ka tentetba dak sendakba nung Naidu-i, "Tesüiba mapangtem nunga asenoki ibaji kuli nguogo. Tangatetba mali, common programme ka mali, lenir shimtsü atema melongjemtet. Telongjem Front ka masü saka telemsa Front ka dang akum," ta ashi.

"Anungji Grand Alliance (teloktep) atema inyakbaji tamakok angutsü tai ni bilemer," ta paisa shisem.

West Bengal aser Kerala na dak sendakba nung pai, "Congress, Communists aser Trinamool longjemdaksüner, ibaji ajanga BJP-i Kolkata nung tanüngba tesemtem nung maongka angutsü, aser Kerala nunga Communists aser Congress longjemdaksüner, ibaji ajanga BJP-i maongka angutsü," ta ashi.



Kathmandu, June 7 : Kathmandu, Nepal nung 2017, June 7-nü Nepal tir, Bidhya Devi Bhandari (abelen)-i Nepal Ato Kelonser tasenba, Sher Bahadur Deuba (achichi) mapa inyaksü asoshi kulizü agiba mapang tangokba noksa nung angur. Kasa noksa nung Ato Kelonser mapa doktsüsang, Pushpa Kamal Dahal/Prachanda (abelen nungi tanabuba) aser Constituent Assembly mendenbula, Onsari Gharti Magar (abelen nungi tasembuba) nungera angur.

### Iran nung kiralongrar temi nisung 12 tepset

Tehran, June 07

(Agencies): Nisung temang nung bomb inoker pokdaksüba aser prangpong bener arua Iran indang parliament aser Iran nung nungtu lenir tasü mang ayuba tesemtem Bodhbarnü amakba nung nisung 12 asü. Iba lendong agütsüba tenüing ya Islamic State (IS) teloki agiogo. Iran linük nung kanga tongtipang tesem ana, Tehran yimti tiyong nung aliba Iran parliament aser 1979 nung Islamic revolution tenzüksang, Ayatollah Ruhollah Khomeini indang tasü mang yua aliba tesem nung iba lendong ya agütsü.

Iran indang parliament telung nung lendong agütsür kiralongrar aser Iran mitkar tsüngta ghonda pongu-shi khatap dang prangpong bener aiter kiralongrar ajunga khaset.

IS teloki osang tiazü prokshiba sapang, Amaq ajanga parliament nung lendong agütsüba mapang tangokba

video ya sayu. Shiite Iran ya ashikülaker nisungtem, ta IS nung Sunni jihadist temi züngshir aser Tehran ya item telok den Syria aser Iraq nung kanga sashia rara.

Osang ajanga ashiba agi, Bodhbar anepdang prangpong bener nisung pezü parliament telungi ait aser parnoki iba parliament anüker ka aser anu tanga nisung ka khaset.

Item kiralongrar ya tetsür süputsü süpur aru aser parnok rongnung nisung kait pa-sasa temang nung alenloka aliba bomb bokdaksü aser ka mitkartemi khaset, ta interior ministry ketdangser ajanga ashi.

Iba kasa mapang nung nisung ana Khomeini leper-i ait aser iba leper nung mapa inyaker ka khaset aser tangar eshika yirutsü. Item nisungtem ya tetsür süputsü süpur aruba ajanga tetsür asü tebur-ar mejangjatet.

Iba nisung ana rongnung nisung kati pa temang nung

alenoka aliba bomb pokdaksü aser ka mitkartemi khaset.

Iran indang emergency service ajanga ashiba agi, iba lendong ana nung nisung 12 asü aser 43 yiru.

Bodhbarnü nikongdang tashi nung Iran tir, Hassan Rouhani aser linük nung tanishir, Ayatollah Ali Khamenei-nati iba lendong indang olen kata shia mali.

Iba lendong tenzükbä mapang parliament mena liasü aser iba lendong ajanga senden nung timtem magütsü, ta sayutsü asoshi senden nung züngsem kar-i selfie agia akhi ama maparen inyak.

Parliament Speaker, Ali Larijani-ia iba lendong ajanga timtem balaka magütsütsü aser mitkartemi parnok den raratar, ta shia senden agiyonga ao.

Iba lendong adalokba angashia Russia tir, Vladimir Putin aser Syria foreign ministry ajanga Iran nung busema osang sangdong.

### Cape Town nung yipru tesashi aru, nisung 8 asü

Cape Town, June 07

(Agencies): South Africa nung aliba Cape Town nung ita kashi tsünglu marui lir tanü yipru tesashi aruba ajanga nisung ti taküm sama.

Item taküm samar rongnung kibong ka nungi nisung pezü liasü aser tsüngi yaloktsüba ajanga ki nung mi adoka par pezü ya rongset, ta ketdangser osang ajanga ashi. Nisung meyirjang aika indang kiojen tem iba yipru ajanga raksatsüogo.

Iba tesem ya tsüngsa-rosa sangdonger hopta ana buba nung yipru ya ait. Osang kar ajanga ashiba agi, iba yipru mait tsüngta tamangba yimsü balala amangertem sendena tsünglu arudaksütsü asoshi

sarasadema liasü.

Iba yimti nung yipru arutsü teyimla nung ketdangsertemi nüburtem dang kümdangshia alitsü asoshi taoba hopta nung metetdaksür liasü.

School aser university tem shibangogo. Iba yipru ajanga kiojen raksatsüba aser süngtong laodaksüba ajanga nisung aika yiru, ta kasa osang ajanga ashi.

Bodhbarnü aruba yipru dang tesashiba arutsü lir, ta Western Cape Disaster Management ajanga metetdaksüogo. World News Media Congress senden ka lapoktsütsü asoshi South Africa tir, Jacob Zuma Cape Town-i aotsü aliba iba yipru ajanga athi, ta ketdangser osang ka ajanag ashi.



Pyongyang June 7 : 2017, June 7 nung North Korea indang Korean Central News Agency (KCNA) ajanga sayaba noksa ka nung North Korea lenir, Kim Jong Un-i 8buba Congress of the Korean Children's Union (KCU) senden April 25 House of Culture nung jembidang tangokba noksa nung angur.

### Myanmar mitkar indang tayimtsü samapa oset kar tzüyim nung ngutet

Yangon, June 07

(Agencies): Myanmar mitkar indang tayimtsü ka nung mitkar 100 dak tali den parnok kinungertem mener samapa tayimtsü indang teraksa oset kar Andaman Sea nung Bodhbarnü nikongdang ngutet, ta osang ka ajanga ashi.

Iba tayimtsü aser air traffic control tsüngta tesendaktep samapa sülen tzüyim mitkar indang rong aser anüing nung tayimtsü ajanga iba tesamaba tayimtsü bushi tenzüker liasü.

Myanmar nung Myeik yimti nungi Yangon-i aodang samaba tayimtsü nung ya tanur 12 dak tali mena liasü südi, ta ketdangser temi ashir.

"Iba tayimtsü den osang agitepba ya nikongdang 1:35 ako (07:05 GMT) meta Dawei jila anasa mile 20 bilar sama," ta mitkar ajanga ashi.

Airport osang ajanga ashiba agi, iba tayimtsü nung passenger 105 aser tayimtsü ketdangser 11 mena liasü.

China nungeri yangluba mitkartem belenba tayimtsü nung ya nisung kwika mena liasüar, tejangja osang mitkartemi mashi.

"Tayimtsü raksar aliba oset kar Dawei yimti nungi kilometre 218 bilar tzüyim nung ngutetogo aser tzüyim mitkartem maneni iba tayimtsü bushitar," ta Myeik nung tourism ketdangser, Naing Lin Zaw-i osangbener dang ashi.

Iba tayimtsü ya ali nungi feet 18,000 bilar yima liasü aser iba tayimtsü bushitsü asoshi 'naval ship' pezü aser 'air force' indang tayimtsü ana yok.

Iba tayimtsü samaba mapang Myanmar nung tsüngsang mopung majungba osang kicha meliasü, ta ashir.

Iba tayimtsü ya China nungeri yangluba Y-8F-200 four-engine turboprop lir aser iba tayimtsü ya Myanmar mitkar indang oset belenshiba nung amshia liasü.

Taoba mapang Myanmar nung mitkar lenir eshikati yimsü asüba mapang tayimtsütem ya China nungi bener arua liasü.

Taoba küm February ita nung Myanmar yimtiba, Naypyidaw nungi air force indang tayimtsü ka abusor mapang talangka melie mi adoka apok aser iba lendong nung tayimtsü ketdangser pongu-prong taküm sama.

### Christopher Wray FBI director inyaksü: Trump

Washington, June 07

(Agencies): Taoba mapang US indang Justice Department nung inyaka alisang, Christopher Wray ya FBI director asütsü asoshi US tir, Donald Trump-i nominate süogo.

"Tai maketba nisung, Christopher A. Wray ya FBI nung Director asütsü," ta Trump-i Twitter nung Bodhbarnü zülutsü.

Taoba ita Trump-i FBI Director, James Comey mapa

nungi anentsüba sülen taoba mapang obendanger, yimden yimsüsür aser sorkar mapa nung ozüing amshir ketdangsertem den Trump-i interview agiba sülen Wray ya shimtet.

Wray ya King & Spalding law firm nung inyaker. George Washington Bridge indang ken o bushisüngdangba mapang New Jersey Angh, Chris Christie melen Wray-i shilem agia liasü.

George W Bush US tir

inyakba mapang Wray ya Justice Department nung 2003 nungi 2005 küm tashi assistant attorney general inyaka liasü.

2016 US tir atema election agiba mapang Russia-i Trump busema liasü, ta temolung melemteti aliba ken o FBI ajanga bushiba mapang Comey ya FBI Director liasü aser Trump-i pa mapa nungi anentsüba ajanga nüburtem aikati Trump anema ola adokogo.



Hanoi, June 7 : 2017, June 7 nü Hanoi, Vietnam nung aliba Presidential Palace nung Vietnam tir, Tran Dai Quang-i Czech Republic tir, Milos Zeman agizükba mapang tangokba noksa nung angur.





June 01, 2017 nü Kiphire nung tang tasen yangluba Zisaji Presidency Government College-i tzu supply asutsü atema verification team-i Phakroki ayong semdangba mapang tangokba noksa nung angur. Iba committee nungi Inakhu Sema Liaison Officer, Higher Education Kohima, Lisepe Sangtam, OSD (inspection) Higher Education, Kohima, Helen Jamir Principal ZPC, Benjamin Longkap SDO(C) HQ Kiphire nung den Singrep Village head GB aser ali kiburi semdanga liasü. Parnoki, iba ayong nung mongpu ajak nung tzu angur aser alijia anenzuka maotsusa tashi itta lir ta bushiteta iba tzu supply mapaji tekaraba nung tenzüksü atema temaba ketdangsertem dang metetdaksüogo.

## BJP 21 Tuli Mandal office meshitetba den senden amen

**Tuli (Mokokchung), June 07 (TYO):** June 07, 2017 nü Rev. I. Meren Jamir-i BJP 21 Tuli Mandal office meshitetba, aser iba sentong nung BJP district ketdangsertem aser mandal executive züngsemtem ajak dena liasü.

Iba sentong nung jembidang Meren Jamir-i party nung inyakertem dang nüburtem tsüingda yimchiyimjung alitsü atema inyaksü ajungshiba den külemi lokti nung tesangwa sayurtem asutsü ayongzük.

Paisa party züngsemtem shinga nema yi mejemdaksütsü atema nokdangtsüla, ta ashi.

Iba sentong tembangba sülen

F&RMCA Hall, Tuli Town nung Mandal office ketdangpurtem leniba nung party senden mena liasü aser senden nung minority cell district president, R.N. Nungsang aser general secretary (Administration) BJP Mokokchung district, Moa Imsong natia o tasutsü jembia.

Kasa senden nung BJP state executive, L. Temjen Jamir-ia jembia liasü.

District executive züngsem, I. Toshi Longkumer-i party nung inyakertem dang, taruba General election nung 21 Tuli constituency nungi BJP candidate-i takok angutsü atema

kanga meranga inyaksü ayongzükba den külemi party anema olulu prokbatem nung mamangtsü metetdaksü.

Paisa, Ato kilonser, Narendra Modi lenisüba nung sorkari tesüiba küm asem nung Centre nung aser Nagaland nung inyakertem metetdaksü.

Iba senden nung district mahila morcha president, Wt. Alepla aser district kisan cell president, Wt. Azungla nati anir ketdangsertem aden.

BJP 21 Tuli mandal advisor, S. Sendong Ao-i tepela anküp o jembia iba senden tembangba liasü.

## NE nung state BJP tirtemi nashi tenokdangba... (Tapak 1 nungi...)

Taruba hopta Amit Shah-i Arunachal Pradesh semdangtsü sentong lir. BJP-i North-East nung takok nguyonga arur aser state asem- Assam, Arunachal Pradesh o Manipur nung parnoki state sorkartem kümteta lir.

2019 küm Lok Sabha elections nung BJP-i northeast nung menden 24 aliba nungi teimbaka nung takok angutsü teimla lir.

Northeast kübok Sikkim state nungbo Dalai Lama tesayuba ajanga nisung aikati shi machir, saka state BJP tir Dal Bahadur Chauhan-i ashiba agi, chiyungtsü dak sendakba nung talenba kecha malitsüla.

Arunachal Pradesh unit tir Tapan Gao-ia ashiba agibo, "iba telemtetba atema Centre dak tai metongloktsütsüla, kechiyong Supreme Court-i tuyuba nung ajemdaker Centre-i iba tetuyuba agütsü."

Ajisüaka, paisa ashiba agi, "Arunachal Pradesh nung iba tetuyuba agütsütsüji tamakoktsü aser agütsü nunga mapa küma meinyaktetsü. Democratic linük ka nung, sorkartem nüboritem taginüba akhümtsübuttsüla."

Meghalaya BJP tir Shibun Lyngdoh-i ashiba agi, district ana nung tirtemi party nungi anenbaji parnok nija tangatetba ajanga lir.

"Nüboritem taginübatem anema kecha meinyaktetsü. Asen Linük Temzüng nung tamangba yimsü temeten agüja lir, anungji nüboritem temulung yirutsütsü atema kecha meinyaksüla" ta Shibun-isa nashi nokdangba indang tebilemba metetdaksü.

"Onoki nashi akhümtsübur, saka yangi Hindu nungertem Durga Puja mapang jangtem tepseta tenla agütsü. Iba tenokdangba ajanga parnoka timtemtsü. Tang onok autonomous hill councils indang elections atema kanga mazüngi lir. Iba maparen tembangba sülen, party-i nashi indang onük benoka asadangtsü aser iba osangji centre nung lennirtem dangi abentsü" ta Assam BJP tir Ranjeet-isa metetdaksü.

Mizoram BJP state tir, J V Hluna-ia ashiba agi, taoba mapang BJP tir Amit Shah-i state semdangdang party lennirtemi pa dang Mizo nungeri sobaliba

aser inyakyim memelenshitetsü ta shiogo.

"Onok Khristantem lir aser onoki Laishiba amanger. Onoki onok libaliro memelenshitetsü ta pa dang ashi aser idangji Amit-i 'Ibaji nenok dak aket. Nenoki kechi sülen anidaknür'ar anidakang' ta langzü. Anungji, iba tetuyuba ya Mizoram nung inyakang ta onok dangbo mashitsü" ta J V Hluna-isa shisem.

Tripura state BJP tir Biplab Kumar Deb-ia, Tripura nung aliba nüboritem tamangba tsütsü temeten lir aser parnok achiajamba nung tenokdangba kecha magütsütsü, ta ashi.

"Iba mesükba tenokdangbatem ajanga BJP ya North-East sobaliba anema lir ta nisungtemi bilemstü. BJP ya national party ka lir anungji iba mesükba telemtetbatem magütsüla. Iba tetuyuba ajaga nisungtemi nashishi aser tanga shitem indang onük jembitsü tenzükogo. Iba ajanga asenok inyakyim aser maparen nung tetsükdaksü bener arutsütsü" ta Nagaland state BJP tir Lhoungua-isa shisem.

## Office of the Changtongya Laishir Telongjem

### TENÜNGSANG AGÜTSÜR

Nagamese Baptist Churches Association (NBCA) anitsü asoshi Changtongya Laishir rongnungi **Rev. R. Meren Jamir** nem Executive Secretary menden agütsüba asoshi Changtongya Laishir Telongjemi kanga pelaba metetdaksür. Iba ama menden ngutetsüsa na aser ner kibongi temsüa litetba asoshi laishirtemi tenüngsang tulu agütsür.

Tsüngremer sentong atalokdakja maparen ajak takok ngua bener otetsü asoshi Tsüngremi temjena moajang ta asen CLT-i sarasademtsür.

**Rev. I. Wati Jamir**  
President, CLT

**Mr. Imtimatsüng Lkr**  
Secretary, CLT

## OFFICE OF THE LANGPANGKONG SENSO TELONGJEM MOKOKCHUNG MOKOKCHUNG - 798601 : NAGALAND PELABA SANGDONGER

Wb. Arentemjen Jamir (Akhoya) shiba LSTM nung Tongti Zülur lir, pa nübu tajung ajiteta ano asen Aor tezüksü asoshi wadang tuluba Ao Senden nung Repsem Zülur shimba asoshi LSTM mendenti ajanga pa nem tenüngsang tulu agütsür aser Aolisangeri nübu tajung ka shimtetogo ta kanga pelaba lemsateper. Tsüngremi asen lenir aser Ao Senden takok manung len aniangma. Iba den külemi May 20, 2017 anogo nung LSTM Inti Mungdang amongdang shirnokisa nübu, rongsen aser sarasadem agi yaritepogo, nenok ajak dang kanga pelaba iba osang ajanga sangdonger.

Tzükongsanger wadang nung,  
TONGPANGYANGER LANU PONGEN  
Tir Repsem Zulur

## Tepela Lemsateper

Ao Theological Association 31 buba kümsen inti mungdang Longmisa Baptist Arogo nung alidang Lirmen Senso tamang Samanir Rev. L. Kijungluba Ao Lifetime Ministerial Award mezüngbuba Rev. Dr. Noksangchila nem agütsüba asoshi kanga pelar. ATA ajanga mapa tajung aika inyaka aruogo. Item rongnung Lifetime Ministerial Award tetushi aser aküm tulu aketba senpet Rev. L. Kijungluba tenüng amshitsüsa maongka agütsüba asoshi Lirmen Baptist Arogo aser Rev. L. Kijung Senso Mission ajanga Ao Theological Association purtem dang kanga pelaba lemsateper.

**Rev. A. Mar**  
Pastor, Lirmen Baptist Arogo

## 32 AR-i NSCN (KN) züngsem ana apu



**Dimapur, June 07 (TYO):** Kuwoto Yesca na lir aser Osang tejangja ka angazükba tenaprongji NSCN(KN) nungi lir sülen June 06, 2017 nü HQ aser Kuhuoboto, Dimapur nung IGAR (North) kübok 32 Assam alir, aser tena ket nungi AK-56 Rifles sepaitem aser police Rifle ka den magazine aser AK-densema Christian Hospital, 56 injang pongu puogo, ta Dimapur tesem mita aodang sangdong nungsa shia lir.

nising ana puogo.

Tena den tena ket nungi Assam Rifles sepaitemi apuba osettemji maneni apuba nisung anaji Nishe bushisüngdangtsü atema Awomi'er jabaso arishi küm 44 Diphupar Police Station, SS Major Khuhevi Awomi aser Dimapur ket nung agütsüogo, ta Khetovi Yesca'er jabaso arishi kasa sangdong ajangasa küm 40, SS Under Secretary metetdaksü.

*CBR Forum Bengaluru-i ayongzuka Social Forum, Guwahati Assam nung CBR rogram 17buba Annual Regional Partners Meeting North East alibidang tangokba noksa nung angur. June 6-7 anogotemnung ayongba senden nung, Care & Support Society, Mokokchung, Cherry Blossom Kohima, Grace Society Mokokchung aser Prodigals Home, Dimapur nung CBR NGO tem shilem agia aden.*





### Dominic-i Djokovic tsükdaktsü; Nadal, Halep semi final tongogo

**Paris, June 7 (Agencies):** Bodhbarnü French open quarter-final nung Defending champion Novak Djokovic Dominic Thiem-i tsükdaktsüa asayamong nungi toguogo.

Thiem-i straight set nung Djokovic koka semifinal-i iogo. Pa taruba asaya French open 9 ben koker alisang Nadal den asayatsü.

Thiem-i 7-6, 6-3, 6-0 agi Djokovic madak takok ngua liasü. Djokovic atema küm 7buba nung tang ya iba asayamong nungi takaratiba togur asütsü.

"Roland Garros nung Novak den tanaben asayaa koker semifinal-i aiba ya pungmang ama lir," ta Thiem-i ashi. 2016 küm kasa asayamong semi-final nung Djokovic-i pa straight sets nung koka liasü. Tena tsüngda trokben asayaba nung Thiem-i tanga ya mezüngbuba akoker.

Kasa asayamong nung

Pablo Carreno Busta yiruba sülen Rafael Nadal French Open semi-finals nung 10ben buba asayatsü asoshi maongka nguogo. Iba asaya Nadal-i 6-2, 2-0 agi kokya liasü.

Asaya tenzüker minute 51buba nung Pablo Carreno Busta tepok nung timtem

### FRENCH OPEN 2017

adokba ajanga masayateti anenadok.

Iba takok ajanga Nadal-i clay nung 102 ben asayaba nungi 100 ben kokogo.

Maneni Mongolbarnü tetsürtem quarter-final asaya nung Simona Halep-i Elina Svitolina madak takok ngua semifinal tongtetogo.

Lai, Elina Svitolina madak 3-6 7-6(6) 6-0 agi takok ngua liasü. Halep semifinal nung second-seeded Czech Karolina

Pliskova den asayatsü.

French Open tarep temeyoktep asaya nung India nung asayar Rohan Bopanna final tongtetogo aser iba takok ajanga pa India nunger rongnungi grand slam akoker pezübuba asütsü asoshi maongka nguogo.

Bopanna aser pa partner Canada tsür Gabriela Dabrowski nati Andrea Hlavackova aser Edouard Roger-Vasselin madak 7-5 6-3 agi takok ngua final tongtetogo.

Iba final ya Bopanna atema grand slam nung tanabuba final asütsü. 2010 küm US open tebur tarep asaya nung pa indang Pakistan nunger partner Aisam-ul-haq-Qureshi den final tongteta liasü.

Bopanna aser Gabriela Dabrowski na final nung Anna-Lena Groenefeld aser Robert Farah na den asayatsü.

### Kilenmeren-i Asia Cup nung India tenüng nung shilem agitsü



Archery Coach, Hunezo Thisa aser Kilenmeren

**Kohima, June 7 (TYO):** Nagaland Archery Academy, I.G. Stadium, Kohima nungi lasang kashishir Kilenmeren tawa June 2 nungi 5 tashi Haryana kübok Rohtak nung All India Selection agiba mapang nung shilem agia shimogo.

Pa taküm July ita 3 nungi 7 tashi Chinese Taipei nung Asia Cup Archery nung India tenüng nung shilem agitsü

Arishi küm 18 tain Kilingmeren ya Mokochung kübok Mopungchuket yimtsüng nungi lir. Pa Department of School Education, SSA Scheme kübok Academy nung shimoka liasü.

Archery Coach, Hunezo Thisa, shiba lasang kashishiba nung international jenjang nung

medal ngua ali, pai ashiba agi, Kilingmeren ya Asia jenjang nung dang masü saka alima ajanga nunga tokteptetsüsa sempet lir.

Hunezo-i ashiba agi, pa küm 6 academy nung aliba mapang pa indang tejangraba aser performance kanga tajung liasü.

Pai national level nung medal balala anguba ajanga tawa India sorkari senotsü teyari agüja Korea nung training agitsü asoshi maongka nagu liasü.

Maneni Academy-i Department of Youth Resources & Sports aser Nagaland Archery Association puri training aser asayamong mapang academy senotsü teyari agüja nungitba atema pelaba metetdaksü.

### Goa nung National Games alitsü anogo atsülanger

**Panaji, June 07 (Agencies):** Goa nung National Games alitsü asoshi kiojen taruba küm ang sütetsü, anungji state nung National Games alitsü anogo atsülanger, ta Goa Chief Minister, Manohar Parrikar-i ashi.

Iba asayamong ya 2016 küm September nung amongtsü liasü saka taoba state sorkar, Laxmikant Parsekar lenisüba mapang iba asayamong ya 2017 küm November ita-i thinena

liasü. "Nüngdakba kiojentem tajemba jenjang nung yanglur Goa-i National Games taruba küm ayongzüka amongtsü renema lir," ta Parrikar-i tanü osangbener dang ashi.

"National Games atema kiojen yanglutsü asoshi sen crore 570 nüngdaktsü ta sentong yanglua liasü aser ibaji sen crore 400 dang kümtsüogo. Iba sen ya crore 350 tashi alutsü ni imlar," ta pai ashi.

State nung tesem ajanga nung saisapongtsü asoshi kiojen yanglua ayubaji junger saka item kiojen tem anepalua wazüka ayutsü nüngdaker, ta Parrikar-i shisem.

"Saisapongdang amshiba osettem ya tesem tezülen oa yutsüra, shibai item oset aser kiojen anepalutsü. Anungji item ajak shisadanger ang saisapongtsü atema kiojen yanglutsüla," ta Goa Chief Minister-i ashi.

### Manchester United alima nung jenjang tasaktiba football club kümogo

**June 7, 2017 (Agencies):** Manchester United puri European champion Real Madrid melenzüka alima nung jenjang tasaktiba football team kümogo, ta osang ka ajanga Mongolbarnü metetdaksü.

United pur jenjangji billion \$3.69 lir koba yaküm den medemdangra shilem 11 agi timba lir. Iba ya team indang brand aser marketing ajanga lir, ta kasa osang ajanga metetdaksü.

Football team jenjang sükdangba nung United sülen Barcelona tanabuba jenjang



Club jenjang sükdangba nung lir. Parnok jenjangji billion \$3.64 lir aser iba sülen küm pezü tashi temaba jenjang nung aliba Real Madrid team tasembuba jenjang nung lir. Parnok jenjang billion 3.58 lir.

Club jenjang sükdangba

nung temaba pongu nung Bayern Munich (\$2.71 billion) pezübuba aser Manchester City (2.08 billion) pungobuba ta alitsü.

United aser City den külemi club jenjang sükdangba nung Premier League nungi team 6 lir, item rongnung Arsenal (\$1.93 billion), Chelsea (\$1.85 billion) Liverpool (\$1.49 billion) aser Tottenham Hotspur (\$1.06 billion) ta alitsü.

Osang ajangasa ashiba agi, temaba jenjang nung aliba team 20 jenjang yaküm dang nungi shilem 3 agi timba küma billion \$1.48 lir.

### Menoknok nungi Nagaland jenbu...

Tesüiba küm ishika tsüngda asen state nung mongpu melenshiyonga arur aser iba ajanga lendong balala ajurur. Ajisüaka, iba dak sendakba mongin nisungtemi lendongtsüdong nungi jenbutsü aser mapa inyaksü atema asadangdar.

Lendongtsüdong atalokdang yariteptsü atema Village Guards nem tesayubatem agütsüogo aser Armed Forces o Police nung company kar nema training agütsüogo. Maneni tawa tu,

district ajak nung State Disaster Response Force (SDRF) tentetogo, ta Nagaland chief secretary-isa metetdaksü.

Sentong nung Consultant (ME & IRS) NDMA, Brigadier Kuldeep Singh-i o jembidang, alima nung lendong kanga atalokba tesemtem rongnung India densema lir, ta ashi.

Alima lendong tulu atalokba linüktem tarensen nung China, US aser Philippines sülen India jenjang pezübuba nung lir, ta Brigadier Kuldeep-i shisem.

Tarutsü nung infrastructure constructions ajak lendong balala nungi küzmzüksüsa yanglutsüla aser Nagaland nung lendongtsüdong atema capacity building maparen inyakba atema kanga pelar, ta paisa metetdaksü.

Anogo ananü training tenzüka sentong nung mendenji Commissioner & Secretary (NSDMA) Khrienuo Metha liasü aser Additional Chief Secretary (Home) Temjen Toy-i tesentepertem pela agizük.

### TYO-i Kohima Mini Zoo... (Tapak 1 nungi...)



June 7, 2017 nü Gasie, Kohima nung taoba sorkar ketdangser K K Sema, Mini Zoo Kohima kibur Ruvuotuo Belho aser TYO ketdangpurtemi ozütem chiokba noksa nung angur.

Mini Zoo kiburi ozü aser shirurutem anepaluba dang masü saka wazüka ayuba atema tanü KK Sema-i tenüngsang agütsü.

Naga nungeri ozü mesüra shiruru shi ajak achir saka asenoki alima nung t s ü n g s a n g - m o p u n g melenshiba khuret angateta,

asen arem-min aser shirurutem wazüka ayutsüla, ta paisa ayongzü.

KK Sema-isa Forest Department aser State sorkar dang Nagaland state nung ozü aser shiruru anepalur aser wazüka ayutsü merangertem nem teyari agütsütsüla, ta mepishia metetdaksü.

**BILEMDANGANG**  
"Ola madoker aitsütsü tasakba".